

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**N A C R T**

**ZAKON O SLATKOVODNOM RIBARSTVU**

**Sarajevo, novembar 2022. godine**

# ZAKON O SLATKOVODNOM RIBARSTVU

## DIO PRVI - OSNOVNE ODREDBE

### Član 1. (Predmet Zakona)

Zakonom o slatkovodnom ribarstvu u Federaciji Bosne i Hercegovine (u daljem tekstu: Zakon) uređuju se upravljanje ribljim fondom, načela, nadležnosti, ribolovne vode, ribolov, akvakultura, zaštita ribljeg fonda u ribolovnim vodama, evidencije, nadzor, kaznene odredbe i druga pitanja koja su od značaja za slatkovodno ribarstvo Federacije Bosne i Hercegovine (u daljem tekstu: Federacija).

### Član 2. (Veza sa propisima EU)

Usklađivanje odredbi ovog Zakona vršeno je sa: konsolidovanom verzijom Uredbe Vijeća (EZ) 1224/2009 od 20. novembra 2009. o uspostavi sistema kontrole Unije za osiguranje usklađenosti s pravilima zajedničke ribarske politike i o stavljanju izvan snage uredbi (EEZ) br. 2847/93, (EZ) br. 1627/94 i (EZ) br. 1966/2006 (SL L 343, 22.12.2009) objavljenom 14.08.2019. godine (02009R1224 – HR – 14.08.2019 – 006.001); konsolidovanom verzijom Uredbe Vijeća (EZ) 708/2007 od 11. juna 2007. o korištenju stranih i lokalno neprisutnih vrsta u akvakulturi (SL L 168/1, 28.6.2007.) objavljenom 02.04.2022. godine (02007R0708 – HR – 02.04.2022 – 003.001); konsolidovanom verzijom Uredbe (EU) br. 1380/2013 Evropskog parlamenta i Vijeća od 11. decembra 2013. o zajedničkoj ribarstvenoj politici i stavljanju izvan snage uredbi (EZ) br. 2371/2002 i (EZ) br. 639/2004 i Odluke Vijeća 2004/585/EZ (SL L 354, 28.12.2013.) objavljenom 14.08.2019. godine (02013R1380 – HR – 14.08.2019 – 003.001).

### Član 3. (Slatkovodno ribarstvo)

- (1) Slatkovodno ribarstvo (u daljem tekstu: ribarstvo) je ekonomska i društveno korisna djelatnost koja je u funkciji integralne zaštite, uzgoja, održivog korištenja i stalnog poboljšanja kvaliteta ribljeg fonda, staništa, akvakulture i drugih ribolovnih resursa.
- (2) Riblji fond je državna svojina i prirodno dobro od opšteg interesa.
- (3) Ribljim fondom se upravlja na stručan i održiv način, koji doprinosi cjelokupnoj zaštiti ribljeg fonda i prirodnih staništa, te očuvanju biološke raznolikosti u slatkim vodama.
- (4) Ribe se u slatkim vodama mogu loviti i/ili uzgajati pod uslovima utvrđenim ovim Zakonom i propisima donesenim na osnovu njega.
- (5) Odredbe ovoga Zakona odnose se i na lov, uzgoj i zaštitu rakova, školjki, žaba, kao i svih drugih organizama koji žive u ribolovnoj vodi.
- (6) Veterinarsko-zdravstvena zaštita ribljeg fonda u ribolovnim vodama i ribnjacima vrši se na način kako je to regulisano odredbama propisa o zdravlju životinja.
- (7) Ovaj Zakon primjenjuje se na sva pravna i fizička lica, javne ustanove, udruženja ili organizacije sportskih ribolovaca koje obavljaju djelatnost u privrednom, sportskom,

privredno-sportskom, selektivnom i sanacionom ribolovu, ribolovu u naučno-istraživačke svrhe i akvakulturi na ribolovnim vodama Federacije.

#### **Član 4. (Definicije)**

(1) U ovom Zakonu pojedini pojmovi imaju sljedeće značenje:

- a) **akvakultura** je uzgoj ili kultivacija vodenih organizama korištenjem tehnika osmišljenih da povećaju proizvodnju navedenih organizama preko prirodnog kapaciteta okoliša, gdje organizmi ostaju u vlasništvu fizičke ili pravne osobe tokom faze uzgoja i proizvodnje, do i uključujući fazu izlova;
- b) **alohtona vrsta riba** je riba neizvornog (stranog) porijekla i koja prirodno ne živi u nekom području, nego je u njega namjerno ili slučajno unijeta;
- c) **autohtona vrsta riba** je riba rasprostranjena u određenom geografskom području u granicama nastalim prirodnim procesima (bez ljudskih intervencija) i prilagođena životnim uslovima tog područja;
- d) **biološka raznolikost (biodiverzitet)** je raznolikost živog svijeta na zemlji, kako između vrsta tako i unutar vrsta;
- e) **ciprinidne vode** označavaju vode odgovarajućih hidromorfoloških karakteristika i kvaliteta, koje omogućavaju ili bi u slučaju smanjenja onečišćenja mogle omogućiti život riba iz porodice šarana (*Cyprinidae*);
- f) **dozvola** je pisani akt nadležnog organa na osnovu kojeg korisnik smije obavljati djelatnost privrednog, privredno-sportskog, selektivnog i sanacionog ribolova, ribolova u naučno-istraživačke svrhe, akvakulture, te ostale aktivnosti u skladu sa odredbama ovog Zakona i propisima donesenim na osnovu njega;
- g) **endemska vrsta riba** je riba rasprostranjena na određenom, obično uskom geografskom području i prilagođena specifičnim životnim uslovima tog područja;
- h) **godišnji program upravljanja** je dokument upravljanja ribljim fondom ribolovnog područja ili ribolovne zone tokom kalendarske godine, izrađen na osnovu ribolovno-privredne osnove za to ribolovno područje ili zonu;
- i) **ikra** je odomaćeni naziv za riblja jaja u svim razvojnim fazama;
- j) **invazivna vrsta riba** je vrsta koja predstavlja prijetnju autohtonim vrstama riba, uslugama ekosistema i/ili zdravlju ljudi;
- k) **kopnene vode** su sve stajaće ili tekuće vode na površini kopna i sve podzemne vode na kopnenoj strani od linije od koje se mjeri širina teritorijalnih voda;
- l) **lovostaj** je vremenski period u kojem se pojedine vrste riba, osim riba iz akvakulture, ne smiju loviti niti stavljati u promet;
- m) **matica** je spolno dozrela riba, bez obzira na spol;
- n) **mlač** predstavlja različite razvojne oblike riba u dobi do postizanja spolne zrelosti;
- o) **mrjestilište** je objekat na ribljoj farmi u kojem se obavlja vještačka reprodukcija riba i uzgoj ribljih larvi;
- p) **održivo korištenje ribljeg fonda** podrazumijeva provođenje ribolova do te mjere da način i vrijeme korištenja omogućavaju njegovo prirodno samoobnavljanje i/ili sa posebnim mjerama upravljanja dugoročno očuvanje ribljeg fonda, a da se pri tome ne ugrožava povoljno stanje biljnog i životinjskog svijeta;

- r) **pomor ribe** podrazumijeva povrjeđivanje, oštećenje, ubijanje i svaki drugi oblik uništavanja ribe u količini većoj od 20% (dvadeset) od ukupnog ribljeg fonda procijenjenog ribolovnom osnovom na određenom ribolovnom području ili u određenoj ribolovnoj zoni;
- s) **poplavljeno područje** je područje uz vodotok koje može biti poplavljeno uslijed izlivanja vode iz korita, tokom poplavnog događaja;
- t) **poribljavanje ribolovnih voda** je plansko unošenje ribe, mlađi i oplodene ikre u ribolovne vode u cilju održavanja i unaprjeđenja ribljeg fonda;
- u) **posebno stanište** je dio ribolovne vode koji ima posebnu zaštitu zbog svoje uloge u obnavljanju ihtiopopulacija prirodnim putem, a može biti mrjestilište, rastilište, hranilište, zimovalistište ili migracioni put;
- v) **prirodno plodište** je dio ribolovne vode u kojem se ribe mrijeste (razmnožavaju) prirodnim putem i u kojem se odgaja mlađ;
- z) **privredni ribolov** je djelatnost koja podrazumijeva lov ribe profesionalnim ribolovnim alatima i opremom, radi stavljanja ulovljene ribe u promet i sticanja dobiti;
- aa) **privredno-sportski ribolov** je djelatnost koja podrazumijeva pružanje usluga u obavljanju sportskog ribolova na ribnjaku, radi stavljanja ulovljene ribe u promet i sticanja dobiti;
- bb) **privremeni program** je program ulaganja i upravljanja ribljim fondom u ribolovnom području/zoni do donošenja Ribarske osnove;
- cc) **program revitalizacije životnih zajednica** je naučno-istraživačka, stručna studija o uslovima i načinu obnavljanja i zaštite životnih zajednica, posebno ribljeg fonda, u ribolovnim vodama u kojima je došlo do značajnih promjena životnih uslova;
- dd) **reintrodukcija (ponovno uvođenje)** je ponovno naseljavanje neke riblje vrste u područje u kojem je izumrla, a u eko sistemu još uvijek postoje ili su ponovno uspostavljeni približno jednaki ekološki uslovi kao prije izumiranja a koji omogućuju njezino preživljavanje;
- ee) **ribar** je lice koje obavlja privredni ribolov, radi stavljanja ulovljene ribe u promet i ostvarivanja dobiti;
- ff) **riblji fond** obuhvata sve vrste riba, mekušaca, rakova i ostalih vodenih organizama koji žive u ribolovnoj vodi;
- gg) **ribnjak** je omeđeni prostor na zemljištu, namjenski ispunjen vodom i uređen za obavljanje djelatnosti akvakulture ili privredno-sportskog ribolova;
- hh) **ribogojilište ili riblja farma** je objekat sa bazenima ili plutajućim kavezima, namjenski uređen za obavljanje djelatnosti akvakulture;
- ii) **ribočuvar** je službeno lice, stručno osposobljeno za obavljanje nadzora u sportskom ribolovu na određenom ribolovnom području ili zoni;
- jj) **ribolov** je lov riba u ribolovnim vodama uz upotrebu dopuštenih ribolovnih alata i opreme;
- kk) **ribolov po sistemu „ulovi i pusti“** je oblik sportskog ribolova u kojem se ulov ne zadržava;
- ll) **ribolov u naučno-istraživačke svrhe** je ribolov koji se provodi u svrhu realizacije naučnih i stručnih programa, projekata, studija, elaborata i svih drugih dokumenata vezanih za slatkovodno ribarstvo;
- mm) **ribolovac** je lice koje obavlja sportski ribolov radi sporta ili rekreacije;
- nn) **ribolovna dozvola** je odobrenje na osnovu kojeg ribolovci mogu obavljati sportski ribolov;

- oo) **ribolovna zona** je dio ribolovnog područja koja omogućava održivo korištenje i upravljanje ribljim fondom, te njegovu zaštitu i unaprjeđenje;
- pp) **ribolovne vode** su sve površinske kopnene vode u kojima stalno ili povremeno žive ribe i drugi vodeni organizmi i u kojima se može obavljati ribolov;
- rr) **ribolovni alat** je sredstvo kojim se obavlja ribolov;
- ss) **ribolovni revir** je dio ribolovne vode sa dobro očuvanim ribljim fondom, kojeg korisnik ribolovnog prava može koristiti pod posebnim uslovima ribolovnog režima;
- tt) **ribolovni režim** obuhvata mjere i aktivnosti koje se smiju provoditi u cilju obavljanja sportskog ribolova i koje moraju biti prilagođene prirodnim uslovima ribolovne vode: način obavljanja ribolova, dozvoljene ribolovne alate i opremu, količinu dozvoljenog ulova i eventualne zabrane;
- uu) **ribolovno područje** je prostorna jedinica koja obuhvata slivno područje nekog vodotoka ili njegov dio i kao takvo čini jedinstvenu hidrografsku, biološku i privrednu cjelinu;
- vv) **ribolovno pravo** je pravo upravljanja ribljim fondom u svrhu obavljanja sportskog ribolova, čuvanja, zaštite i unapređenja ribljeg fonda;
- zz) **ribolovno-privredna osnova** je naučno istraživačka studija o načinu korištenja i upravljanja ribolovnim područjem ili zonom, a odnosi se na obavljanje sportskog i privrednog ribolova;
- aaa) **salmonidne vode** označavaju vode odgovarajućih hidromorfoloških, fizičko-hemijskih i bioloških osobina i kvaliteta, koje omogućavaju ili bi u slučaju smanjenja onečišćenja mogle omogućiti život riba iz porodice pastrmki (*Salmonidae*);
- bbb) **salmonidno-ciprinidne** ili **ciprinidno-salmonidne vode** označavaju vode odgovarajućih hidromorfoloških, fizičko-hemijskih i bioloških osobina i kvaliteta, koje omogućavaju ili bi u slučaju smanjenja onečišćenja mogle omogućiti život riba iz porodice pastrmki (*Salmonidae*) i riba iz porodice šarana (*Cyprinidae*);
- ccc) **sanacioni ribolov** je ribolov koji se provodi u svrhu poboljšanja stanja ribljeg fonda u nekoj ribolovnoj vodi (sprječavanje širenja invazivnih alohtonih vrsta, premještanje ribljeg fonda u iznimnim situacijama, i slično);
- ddd) **selektivni ribolov** znači obavljanje ribolova ribolovnim metodama ili ribolovnim alatima koji ciljaju i love organizme prema veličini ili vrsti za vrijeme ribolovne operacije, što omogućava da se neciljani primjerci izbjegnu ili puste neozlijeđeni;
- eee) **strana vrsta** znači:
  - 1. vrsta ili podvrsta vodenog organizma koja se javlja izvan poznatog područja svoje prirodne rasprostranjenosti i područja mogućeg prirodnog širenja;
  - 2. poliploidni organizmi i umjetno stvorene hibridne vrste bez obzira na područje njihove prirodne rasprostranjenosti ili mogućnost širenja;
- fff) **sportski ribolov** je djelatnost koja podrazumijeva lov ribe udičarskim ribolovnim alatima i opremom, radi sporta ili rekreacije;
- ggg) **šteta pričinjena ribljem fondu** podrazumijeva svaki oblik narušavanja zdravlja i ugrožavanja života riba i svaki oblik utvrđenog smanjenja ribljeg fonda.

- hhh) **ulov** predstavlja ulovljene, označene i zadržane primjerke riba u sportskom i privrednom ribolovu;
- iii) **vodeni organizmi** su sve vrste koje žive u vodi, a koje pripadaju carstvima životinja, biljaka ili protista, uključujući sve dijelove, gamete, sjeme, jajašca ili propagule njihovih jedinki, koji su sposobni preživjeti i dalje se razmnožavati;
- jjj) **vodotok** čini korito tekuće vode zajedno sa obalama i vodama koje njime stalno ili povremeno teku;
- kkk) **zaštita ribljeg fonda** obuhvata skup mjera koje se poduzimaju radi očuvanja i unaprjeđenja ribljeg fonda i osiguravanja uslova za održivo i dugoročno korištenje ribljeg fonda i njegovog staništa.
- (2) Pojedini izrazi upotrijebljeni u ovom zakonu za označavanje muškog ili ženskog roda podrazumijevaju oba spola.

## **Član 5. (Načela)**

Ovaj se Zakon zasniva na načelima da:

- a) je riblji fond u državnoj svojini;
- b) je riblji fond prirodno dobro od opšteg interesa;
- c) riblji fond mogu koristiti svi ravnopravno u skladu s odredbama ovog Zakona i propisa donesenih na osnovu njega, Zakona o zaštiti prirode („Službene novine Federacije BiH“, broj 66/13)-(u daljem tekstu: Zakon o zaštiti prirode) i Zakona o vodama („Službene novine Federacije BiH“, broj 70/06) - (u daljem tekstu: Zakon o vodama);
- d) se riblji fond koristi i da se njime upravlja na stručan i održiv način;
- e) se riblji fond ribolovnih voda u granicama posebno zaštićenim prirodnim vrijednostima iz člana 134. Zakona o zaštiti prirode koristi i njime upravlja u skladu s odredbama ovog Zakona i propisa donesenih na osnovu njega;
- f) se osigura učešće zainteresovanih strana u donošenju akata i pristupa javnosti potpunim, tačnim i pravovremenim informacijama o stanju u oblasti ribarstva;
- g) planiranje, promocija i kontrola uzgoja ribe radi poribljavanja;
- h) sprječavanje unošenja stranih vrsta riba i njihovo širenje u kopnenim vodama.

## ***Poglavlje I. Subjekti u ribarstvu i njihove nadležnosti***

### **Član 6. (Federalno ministarstvo)**

U obavljanju poslova iz slatkovodnog ribarstva u skladu s odredbama ovog Zakona i propisa donesenim na osnovu njega Federalno ministarstvo poljoprivrede, vodoprivrede i šumarstva (u daljem tekstu: Federalno ministarstvo):

- a) analizira dostavljene podatke i ocjenjuje stanje ribljeg fonda i aktivnosti upravljanja i zaštite ribljeg fonda;
- b) izrađuje Program razvoja slatkovodnog ribarstva u Federaciji;
- c) izdaje ovlaštenja i vodi evidenciju o izdatim ovlaštenjima za obavljanje naučnih i stručnih poslova u oblasti ribarstva;

- d) imenuje Komisiju za ispite u slatkovodnom ribarstvu;
- e) imenuje Savjetodavno vijeće za ribarstvo;
- f) priprema Programe za polaganje ispita u slatkovodnom ribarstvu, izdaje uvjerenja i vodi evidenciju o izdatim uvjerenjima o položenim ispitima u slatkovodnom ribarstvu;
- g) izdaje saglasnosti i vodi evidenciju o izdatim saglasnostima na Ribolovno-privrednu osnovu (u daljem tekstu: Ribolovna osnova), Reviziju ribolovne osnove, Program revitalizacije životnih zajednica (u daljem tekstu: Program revitalizacije) i Reviziju programa revitalizacije;
- h) izdaje dozvole i vodi evidenciju o izdatim dozvolama za privredno-sportski ribolov;
- i) izdaje dozvole i vodi evidencije o izdatim dozvolama za posebne vidove ribolova;
- j) izdaje dozvole i vodi evidencije o izdatim dozvolama za akvakulturu;
- k) izdaje odobrenja i vodi evidenciju o izdatim odobrenjima za uzgoj autohtonih vrsta riba i drugih vodenih organizama;
- l) izdaje odobrenja i vodi evidenciju o izdatim odobrenjima za uzgoj alohtonih vrsta riba i uvozu alohtonih vrsta riba i drugih vodenih organizama i oplodene ikre za potrebe akvakulture;
- m) izdaje odobrenja i vodi evidenciju o izdatim odobrenjima za premještanje ribljeg fonda;
- n) izdaje saglasnosti i vodi evidencije o izdatim saglasnostima o proglašenju posebnog staništa, posebnih ribolovnih staza i ribolovnih voda sa zabranom ribolova;
- o) izdaje saglasnosti i vodi evidenciju o izdatim saglasnostima na program i reviziju programa revitalizacije ribljeg fonda;
- p) rješava žalbe izjavljene zbog oduzimanja ili uskraćivanja dozvola, ribolovnog prava ili nekog drugog dokumenta stečenog na osnovu ovog Zakona;
- r) utvrđuje potrebne mjere za otklanjanje ili smanjivanje štete na ribljem fondu nastale kao posljedica elementarnih nepogoda;
- s) propisuje pravilnike i druge podzakonske akte koji proizilaze iz ovog Zakona;
- t) organizuje poslove koji imaju za cilj sprječavanje ili smanjenje štetnih posljedica po ribolovne vode i riblji fond;
- u) učestvuje sa drugim nadležnim organima u izradi programa i planova za korištenje prirodnih resursa;
- v) vrši druge poslove i zadatke zaštite ribljeg fonda iz nadležnosti Federacije.

## **Član 7. (Kantonalno ministarstvo)**

U obavljanju poslova iz slatkovodnog ribarstva u skladu s odredbama ovog Zakona i propisa donesenim na osnovu njega kantonalno ministarstvo nadležno za poslove poljoprivrede (u daljem tekstu: kantonalno ministarstvo):

- a) imenuje Komisiju za ribarstvo;
- b) vrši promjenu namjene ribolovne vode ili njenog dijela u slučaju proglašenja ribolovne vode ili njenog dijela zaštićenim dijelom prirode (nacionalni park, park prirode, rezervat i sl.) ili područjem iz koga se zahvata voda za javno snabdijevanje pitkom vodom;
- c) vodi katastar ribolovnog područja;
- d) izdaje dozvole i vodi evidenciju o izdatim dozvolama za privredni ribolov;

- e) dodjeljuje ribolovno pravo na ribolovnim područjima i/ili ribolovnim zonama;
- f) zaključuje ugovore o obavljanju privrednog ribolova i dodjeli ribolovnog područja ili zone na korištenje;
- g) donosi rješenje o privremenom ograničenju ili zabrani privrednog ribolova;
- h) donosi rješenje o oduzimanju dozvole za privredni ribolov i ribolovnog prava;
- i) izdaje saglasnosti i vodi evidenciju o izdatim saglasnostima na Godišnji program upravljanja ribolovnim područjem ili zonom (u daljem tekstu: Godišnji program);
- j) vrši raspodjelu sredstava uplaćenih za naknadu za obavljanje privrednog ribolova i naknadu za korištenje ribolovnog područja/zone u skladu sa čl. 18. stav (4) i 24. stav (8);
- k) daje mišljenje na Ribolovnu osnovu i Reviziju ribolovne osnove, Program revitalizacije i Reviziju programa revitalizacije;
- l) daje mišljenje i vodi evidencije o izdatim mišljenjima o proglašenju posebnog staništa, plodišta i ribolovnog revira;
- m) vrši nadzor nad radom i poslovanjem korisnika ribolovnog prava i ispunjavanja obaveza proisteklih iz ugovora o dodjeli ribolovnog prava, Ribolovne osnove i Godišnjeg programa za ribolovno područje/zonu za koju je dobiveno.

### **Član 8.**

#### **(Sportsko-ribolovni savez Federacije BiH)**

- (1) Sportsko-ribolovni savez (u daljem tekstu: Savez) je organizovan u skladu sa Zakonom o udruženjima i fondacijama („Službene novine Federacije BiH“, broj 42/02), i obavlja slijedeće poslove:
  - a) osigurava i vrši distribuciju ribolovnih dozvola;
  - b) osigurava i vrši distribuciju uniformi, legitimacija i znački ribočuvara;
  - c) učestvuje u radu Komisije za ispite u slatkovodnom ribarstvu;
  - d) prikuplja godišnje podatke o količini i sastavu ulova u sportskom i privrednom ribolovu;
  - e) obavlja i druge poslove u skladu sa Statutom Saveza.
- (2) Savez pri vršenju poslova iz stava (1) ovog člana obavezan je da ispunjava minimalno sljedeće uslove:
  - a) da djeluje na području Federacije;
  - b) da ima osposobljena lica za sprovođenje poslova iz stava (1) ovog člana;
  - c) da ima potrebnu infrastrukturu za efikasno sprovođenje poslova iz stava (1) ovog člana.
- (3) Savez dostavlja Federalnom i kantonalnom ministarstvu godišnji izvještaj o sprovođenju poslova iz stava (1) tačka (a), (b) i (d) ovog člana, najkasnije do 31. januara tekuće godine za prethodnu godinu.
- (4) Sredstva za svoje djelovanje Savez obezbjeđuje kroz članarinu, prihode za izdate ribolovne dozvole u visini od 10% (deset) cijene dozvole od korisnika ribolovnog prava, doprinose članova, donacija, edukacija sportskih ribolovaca i ribočuvara kao i drugih izvora.

### **Član 9.**

#### **(Ovlašteno lice)**

- (1) Naučne, istraživačke, stručne i druge studije i analize koje su u skladu sa odredbama ovog Zakona i propisa donesenih na osnovu njega, može izrađivati



- naučna, stručna ustanova i pravno lice (u daljem tekstu: ovlašteno lice), koje posjeduje ovlaštenje za obavljanje naučnih i stručnih poslova u oblasti ribarstva.
- (2) Ovlaštenje za obavljanje naučnih i stručnih poslova u oblasti ribarstva izdaje Federalno ministarstvo, najkasnije u vremenskom roku od 60 dana od dana podnošenja zahtjeva za izdavanje ovlaštenja.
  - (3) Ovlaštenje za obavljanje naučnih i stručnih poslova u oblasti ribarstva izdaje se na vremenski period od pet godina.
  - (4) Federalni ministar poljoprivrede, vodoprivrede i šumarstva (u daljem tekstu: Federalni ministar) ovlaštenom licu za obavljanje naučnih i stručnih poslova u oblasti ribarstva rješenjem oduzima ovlaštenje ako prestane ispunjavati uslove ili se utvrdi da poslove ne obavlja u skladu sa odredbama ovog Zakona i propisa donesenim na osnovu njega.
  - (5) Protiv Rješenja kojim se uskraćuje ovlaštenje za obavljanje naučnih i stručnih poslova u oblasti ribarstva, ili se ovlaštenje oduzima, nije dopuštena žalba, ali se može pokrenuti upravni spor kod nadležnog suda.
  - (6) Pokretanje upravnog spora ne odgađa izvršenje rješenja.
  - (7) Federalni ministar propisuje način i uslove koje mora ispunjavati ovlašteno lice za obavljanje naučnih i stručnih poslova u oblasti slatkovodnog ribarstva, te druga pitanja vezana za obavljanje naučnih i stručnih poslova u oblasti slatkovodnog ribarstva.

#### **Član 10. (Savjetodavno vijeće za ribarstvo)**

- (1) Federalni ministar osniva Savjetodavno vijeće za ribarstvo.
- (2) Savjetodavno vijeće za ribarstvo ima konsultativnu i savjetodavnu ulogu i osniva se radi pružanja naučne i stručne podrške Federalnom ministarstvu, potiče donošenje novih propisa iz područja ribarstva i sudjeluje u kreiranju ribarske politike.
- (3) Savjetodavno vijeće za ribarstvo čine predstavnici tijela federalne i kantonalne uprave, Saveza općina i gradova Federacije BiH, naučnih i stručnih ustanova, udruženja u ribarstvu osnovanih i priznatih u skladu s posebnim propisima.
- (4) Članove Savjetodavnog vijeća imenuje federalni ministar na period od četiri godine.

### ***Poglavlje II. Komisije i Program razvoja slatkovodnog ribarstva***

#### **Član 11. (Komisija za ispite)**

- (1) Poslove u oblasti slatkovodnog ribarstva mogu obavljati samo stručno osposobljena lica.
- (2) Stručna osposobljenost za obavljanje poslova u oblasti slatkovodnog ribarstva stiče se polaganjem ispita u slatkovodnom ribarstvu: ribarski ispit, ribolovački ispit, ribočuvarski ispit, ispit za ribarstvo i ispit za akvakulturu.
- (3) Ispiti iz stava (2) ovog člana se polažu prema programu za polaganje ispita, kojeg priprema Federalno ministarstvo.
- (4) Ispite iz stava (2) ovog člana provodi komisija za ispite u slatkovodnom ribarstvu (u daljem tekstu: Komisija za ispite), koju imenuje Federalni ministar.

- (5) U komisiju za ispite imenuju se stručna lica, najmanje VII stepena stručne spreme, iz Federalnog ministarstva, kantonalnih ministarstava, ovlaštenog lica i predstavnik Saveza.
- (6) Troškove naknade za polaganja ispita snosi kandidat koji polaže ispit.
- (7) Iznimno od odredbi stava (6) ovog člana, troškove polaganja ribočuvarskog ispita snosi korisnik ribolovnog prava.
- (8) Sredstva iz st. (6) i (7) ovog člana uplaćena za naknadu za polaganje ispita koriste se za pripremanje, provođenje ispita i za rad članova komisije iz stava (4) ovog člana.
- (9) Federalni ministar propisuje način i uslove polaganja ispita, visinu naknade za polaganja ispita i način raspodjele sredstava od naknade, način i uslovi rada Komisije za ispite, obrazac i način izdavanja uvjerenja o položenom ispitu, te druga pitanja vezana za ispite.

### **Član 12. (Komisija za ribarstvo)**

- (1) Komisija za ribarstvo u skladu s odredbama ovog Zakona i propisa donesenih na osnovu njega obavlja poslove:
  - a) davanje mišljenja u postupku provođenja javnog konkursa za dodjelu dozvole za privredni ribolov i akvakulturu;
  - b) provođenja javnog konkursa za dodjelu ribolovnog prava za sportski ribolov;
  - c) monitoring poribljavanja ribolovnih voda.
- (2) Komisiju iz stava (1) ovog člana imenuje kantonalni ministar nadležan za poslove poljoprivrede (u daljem tekstu: kantonalni ministar) iz reda stručnih lica uposlenika ministarstva, najmanje VI stepen stručne spreme iz oblasti poljoprivrede.

### **Član 13. (Program razvoja slatkovodnog ribarstva)**

Federalno ministarstvo će izraditi Program razvoja slatkovodnog ribarstva u Federaciji najkasnije dvije godine od dana stupanja na snagu ovog Zakona.

## ***DIO DRUGI - RIBOLOVNE VODE***

### ***Poglavlje I. Ribolovne vode i pravo na pristup ribolovnoj vodi***

#### **Član 14. (Ribolovne vode)**

- (1) Ribolovnim vodama pripadaju sve tekuće i stajaće površinske vode.
- (2) U tekuće ribolovne vode spadaju rijeke, rječice, potoci i svi drugi prirodni vodotoci, hidromelioracioni sistemi, kanali u kojima postoji stalan ili povremen protok vode;
- (3) U stajaće ribolovne vode spadaju prirodna jezera, vještačke vodne akumulacije, močvare, bare, riječni rukavci, mrtvaje i sve druge prirodne vodne akumulacije koje imaju stalan ili povremen dotok ili oticaj površinskih ili podzemnih voda.

- (4) Ribolovne vode se, na osnovu bioloških karakteristika i kvalitativno-kvantitativnog sastava ribljeg fonda, dijele na salmonidne, ciprinidne i salmonidno-ciprinidne vode.
- (5) Ribolovnim vodama ne pripadaju:
  - a) vode u objektima akvakulture;
  - b) vode u privredno-sportskim ribnjacima;
  - c) vode iz kojih se zahvata voda za piće za javno vodosnabdijevanje ili su rezervisane za tu namjenu;
  - d) vode za koje su donesene odluke o zaštiti izvorišta na osnovu posebnog zakona.
- (6) Iznimno od odredbi stava (5) tačke c) ovog člana, ukoliko se ne radi o izvorištu, kantonalno ministarstvo može odobriti obavljanje sportskog ribolova u ovim vodama, ukoliko isto ne ugrožava ili sprječava njegovu prvobitnu namjenu.
- (7) Kantonalno ministarstvo može izvršiti promjenu namjene ribolovne vode ili njenog dijela u slučaju proglašenja ribolovne vode ili njenog dijela područjem:
  - a) iz koga se zahvata voda za javno snabdijevanje pitkom vodom ili vodom za ljudsku upotrebu;
  - b) za koje je donesena odluka o zaštiti izvorišta na temelju Zakona o vodama;
  - c) zaštićenim dijelom prirode na temelju propisa o zaštiti prirode u kategorijama nacionalnog parka, parka prirode, strogog rezervata i posebnog rezervata;
  - d) za drugu namjenu od posebne važnosti za Federaciju.

## **Član 15.**

### **(Pravo na pristup ribolovnoj vodi)**

- (1) Ribolovac, ribar, korisnik dozvole za privredni ribolov, korisnik ribolovnog prava, korisnik rješenja za ribolov u naučno-istraživačke svrhe, selektivni ribolov i lice koje obavlja nadzor nad provođenjem propisa iz slatkovodnog ribolova imaju pravo pristupa ribolovnim vodama prilazima preko zemljišta koje se nalazi uz tu ribolovnu vodu.
- (2) Vlasnik, korisnik ili na neki drugi način posjednik zemljišta obavezan je dopustiti prijelaz preko svog zemljišta do ribolovne vode licu koje obavlja poslove u oblasti slatkovodnog ribarstva: privrednog, sportskog, selektivnog i sanacionog ribolova, ribolova u naučno-istraživačke svrhe i akvakulture.
- (3) Ako vlasnik, korisnik ili na neki drugi način posjednik zemljišta ne postupi u skladu sa odredbom iz stava (1) ovog člana, korisnik ribolovnog prava podnosi zahtjev za rješenje o privremenom korištenju zemljišta općinskom organu uprave nadležnom za imovinsko-pravne poslove, koji najkasnije u roku od sedam dana od dana podnošenja zahtjeva donosi rješenje.
- (4) Žalba protiv rješenja iz stava (3) ovog člana ne odlaže izvršenje rješenja.
- (5) Lice koje obavlja poslove u oblasti slatkovodnog ribarstva obavezno je da prilikom prijelaza preko zemljišta do ribolovne vode ne utiče ili što manje utiče na stanje zemljišta iz stava (1) ovog člana.
- (6) Ako prilikom obavljanja poslova u slatkovodnom ribarstvu lice iz stava (1) ovog člana pričinu štetu prilikom prijelaza preko zemljišta iz stava (1) ovog člana obavezno je otkloniti nastalu štetu i zemljište dovesti u stanje prije nastanka štete.

- (7) U slučaju nemogućnosti potpunog otklanjanja nastale štete vlasnik, korisnik ili na neki drugi način posjednik zemljišta, na kojem je nastala šteta prilikom prijelaza do ribolovne vode, ima pravo na nadoknadu štete.
- (8) Visina i način nadoknade štete utvrđuju se sporazumno između zainteresovanih strana.
- (9) Ako se ne postigne sporazum o visini i načinu nadoknade štete, o visini i načinu nadoknade štete odlučuje nadležni sud.
- (10) Iznimno od stava (1) ovog člana zabrana prijelaza preko zemljišta do ribolovne vode utvrđuje se u slučaju ugrožavanja stabilnosti vodnog i priobalnog zemljišta u skladu s odredbama Zakona o vodama.

## ***Poglavlje II. Ribolovna područja i katastar ribolovnih voda***

### **Član 16.**

#### **(Ribolovna područja i Katastar ribolovnih voda)**

- (1) Radi održivog korištenja ribljeg fonda, u ribolovnim vodama se ustanovljavaju ribolovna područja.
- (2) Ribolovna područja se dijele na ribolovne zone.
- (3) Ribolovna područja i ribolovne zone određuje Federalno ministarstvo uz pribavljeno mišljenje kantonalnog ministarstva.
- (4) Određeno ribolovno područje, zonu ili neki dio zone Federalno ministarstvo može proglasiti ribolovnim područjem ili zonom od posebnog značaja.
- (5) Ribolovne vode u ribarskim područjima i propisane mjere zaštite i održivog korištenja ribljeg fonda upisuju se u katastar ribolovnih voda koji vodi kantonalno ministarstvo.
- (6) Korisnici ribolovnog prava obavezni su kantonalnom ministarstvu dostaviti podatke neophodne za vođenje katastra ribolovnih voda.
- (7) Federalni ministar propisuje biološku kategorizaciju ribolovnih voda, nazive ribolovnih područja i ribolovnih zona, njihove granice, namjena (privredni i sportski ribolov, akvakultura), oblik i sadržaj obrasca, način vođenja katastra, te druga pitanja vezana za ribolovna područja/zona.

## ***DIO TREĆI - RIBOLOV***

### ***Poglavlje I. Privredni ribolov***

#### **Član 17.**

##### **(Privredni ribolov)**

- (1) Privredni ribolov može se obavljati samo u onim ribolovnim područjima/zonama u kojima je provedbenim propisom iz člana 16. stav (7) ovog Zakona planirano obavljanje ove djelatnosti u skladu sa Ribolovnom osnovom.
- (2) Privredni ribolov može obavljati pravno lice koje ima fizičko lice stručno osposobljeno za obavljanje privrednog ribolova što dokazuje uvjerenjem o položenom ribarskom ispitu.
- (3) Federalni ministar propisuje način i uslove obavljanja privrednog ribolova, količinu i vrstu ribolovnih alata i opreme, količinu i vrstu riba u ulovu, obrazac i sadržaj dozvole za privredni ribolov, te druga pitanja vezana za privredni ribolov.

**Član 18.**  
**(Dozvola za privredni ribolov)**

- (1) Kantonalni ministar donosi rješenje o davanju dozvole za vršenje privrednog ribolova pravnim licima uz naknadu, na osnovu sprovedenog javnog konkursa u skladu sa odredbama ovog zakona i Zakona o koncesijama ("Službene novine Federacije BiH", broj 40/02).
- (2) Odluku o uslovima konkursa iz stava (1) ovog člana i visini naknade, na osnovu pribavljenog mišljenja komisije za ribarstvo i općine, a na prijedlog kantonalnog ministra donosi nadležna vlada kantona.
- (3) Visina godišnje koncesione naknade za privredni ribolov iz stava (2) ovog člana iznosi najmanje 5.000 KM, a varijabilni dio koncesione naknade utvrđuje se u visini od 0,20 KM po kilogramu izlovljene ribe.
- (4) Sredstva od koncesione naknade iz stava (3) ovog člana su namjenska sredstva koja se dijele u omjeru Federaciji 40% (četrdeset), kantonu 30% (trideset) i općini 30% (trideset), a koriste se putem korisnika ribolovnog prava za poribljavanje ribolovnih voda, zaštitu i unapređenje ribljeg fonda u ribolovnom području/zoni za koje je izdato ribolovno pravo, osim namjenskih sredstava Federacije koja se koriste za izradu strateških dokumenata, izradu i realizaciju programa za razvoj ribarstva, kao i pričinjenih šteta od zaštićenih životinjskih vrsta.
- (5) Općinski organ je dužan mišljenje dati u roku od petnaest dana od kada mu je zatraženo, u suprotnom će se smatrati da je isti dao pozitivno mišljenje odnosno Odluka donijeti bez pribavljenog mišljenja.
- (6) Uz prijavu na konkurs lica iz člana 17. stava (2) ovog Zakona obavezno dostavlja rješenje o registraciji djelatnosti ribarstva.
- (7) Dozvola za privredni ribolov se izdaje na vremenski period od pet godina.
- (8) Broj dozvola za privredni ribolov, koje se mogu izdati u jednom ribolovnom području/zoni propisuje se u skladu sa provedbenim propisom iz člana 16. stav (7) ovog Zakona.
- (9) Dosadašnji korisnik dozvole za privredni ribolov ima, pod jednakim uslovima, pravo prvenstva u dodjeli dozvole.
- (10) Korisnik dozvole za privredni ribolov ne može dozvolu za privredni ribolov ustupati ili prenositi na druga lica.
- (11) Obavijest o dodjeli dozvole i kopija dozvole za privredni ribolov dostavlja se korisniku ribolovnog prava za ribolovno područje/zonu obuhvaćeno dozvolom za privredni ribolov, najkasnije osam dana od dana njenog izdavanja.
- (12) Protiv rješenja o odbijanju izdavanja dozvole za privredni ribolov može se izjaviti žalba Federalnom ministarstvu u roku od 15 dana od dana prijema rješenja.

**Član 19.**  
**(Ugovor o koncesiji za obavljanje privrednog ribolova)**

- (1) Kantonalni ministar s korisnikom dozvole za privredni ribolov zaključuje ugovor o koncesiji za obavljanje privrednog ribolova, a kojim se utvrđuje: naziv ribolovnog područja/zone, veličina i granice ribolovnog područja/zone, mjesto, način i uslovi obavljanja ribolova, mjere koje se moraju preduzimati radi zaštite i očuvanja ribljeg fonda, visina fiksne i varijabilne naknade i način plaćanja koncesione naknade za obavljanje privrednog ribolova, uslovi raskidanja ugovora i oduzimanja dozvole za privredni ribolov, te drugi elementi obligaciono-pravnog karaktera.

- (2) Korisnik dozvole za privredni ribolov obavezan je obezbijediti stručno vođenje poslova privrednog ribolova, najkasnije u vremenskom roku od 90 dana od dana potpisivanja ugovora.
- (3) Sredstva uplaćena za naknadu za obavljanje privrednog ribolova su namjenska sredstva Federacije, kantona i općina i koriste se isključivo za poribljavanje ribolovnih voda, zaštitu i unaprjeđenje ribljeg fonda u ribolovnom području/zoni za koje je izdata dozvola za privredni ribolov, osim namjenskih sredstava Federacije koja se koriste za izradu strateških dokumenata, izradu i realizaciju programa za razvoj ribarstva, kao i pričinjenih šteta od zaštićenih životinjskih vrsta.
- (4) Poribljavanje ribolovnih voda iz stava (3) ovog člana provodi se u skladu s odredbama člana 48. ovog Zakona.

## **Član 20.**

### **(Zabrana obavljanja privrednog ribolova)**

- (1) Radi zaštite i očuvanja ribljeg fonda, kantonalni ministar može rješenjem privremeno ograničiti ili zabraniti obavljanje privrednog ribolova.
- (2) Rješenje o privremenom ograničenju ili zabrani privrednog ribolova izdaje kantonalno ministarstvo na osnovu zahtjeva korisnika ribolovnog prava u čijem se ribolovnom području/zoni obavlja privredni ribolov i mišljenja ovlaštenog lica koje je izradilo Ribolovnu osnovu.
- (3) Privremeno ograničenje ili zabrana obavljanja privrednog ribolova može se donijeti na vremenski period najduže od jedne godine.
- (4) Protiv rješenja o privremenom ograničenju ili zabrani privrednog ribolova može se izjaviti žalba Federalnom ministarstvu u roku od 15 dana od dana prijema rješenja.

## **Član 21.**

### **(Oduzimanje i prestanak važenja dozvole za privredni ribolov)**

- (1) Kantonalno ministarstvo će korisniku dozvole za privredni ribolov rješenjem oduzeti dozvolu ako:
  - a) obavlja ribolov alatima i opremom za ribolov koji nisu upisani u dozvolu;
  - b) obavlja ribolov alatima i opremom koji nisu označeni na propisan način;
  - c) obavlja ribolov u količini većoj od upisane u dozvolu;
  - d) ne obezbijedi stručno vođenje poslovima privrednog ribolova u propisanom roku;
  - e) ustupi dozvolu na korištenje ili je prenese na drugo pravno ili fizičko lice;
  - f) ne provodi mjere zaštite i očuvanja ribljeg fonda;
  - g) ne plaća naknadu za obavljanje privrednog ribolova u roku određenom ugovorom iz člana 19. stav (1) ovog Zakona;
  - h) nije započeo obavljati ribolov u roku od šest mjeseci od dana zaključivanja ugovora iz člana 19. stav (1) ovog Zakona;
  - i) ne dostavlja Savezu i kantonalnom ministarstvu godišnji izvještaj o ulovu u privrednom ribolovu u propisanom roku ili dostavlja netačne podatke;
  - j) se prilikom obavljanja ribolova ne pridržava odredbi ovog Zakona i obaveza predviđenih ugovorom iz člana 19. stav (1) ovog Zakona.
- (2) Ako utvrdi nepravilnosti iz stava (1) ovog člana, nadležni poljoprivredni inspektor pokreće postupak za oduzimanje dozvole za privredni ribolov.
- (3) Protiv rješenja o oduzimanju dozvole za privredni ribolov može se izjaviti žalba Federalnom ministarstvu u roku od 15 dana od dana prijema rješenja.

- (4) Obavijest o oduzimanju dozvole za privredni ribolov dostavlja se korisniku ribolovnog prava za ribolovno područje/zonu obuhvaćeno dozvolom za privredni ribolov, najkasnije osam dana od njenog oduzimanja.
- (5) Dozvola za privredni ribolov prestaje važiti na zahtjev korisnika dozvole ili prestankom postojanja lica iz člana 17. stav (2).

#### **Član 22. (Prava i obaveze ribara)**

- (1) Korisnik dozvole za privredni ribolov smije obavljati ribolov samo na onom dijelu ribolovnog područja/zone koji je upisan u dozvolu za privredni ribolov, ribolovnim alatima i opremom koji su upisani u dozvolu na propisan način označeni i u količini upisanoj u dozvoli.
- (2) Ribar za vrijeme obavljanja ribolova mora posjedovati dozvolu kod sebe, odnosno na plovilu koje je upisano u dozvoli.
- (3) Kontrolu ulova, ribolovnih alata i opreme kojima se obavlja privredni ribolov obavlja ribočuvar korisnika ribolovnog prava u ribolovnom području/zoni za koje je izdata dozvola za privredni ribolov.
- (4) Ribar je dužan omogućiti i pružiti ribočuvaru sve potrebne podatke i obavijesti u vezi sa obavljanjem privrednog ribolova.
- (5) Korisnik dozvole za privredni ribolov obavezan je voditi evidenciju o ribolovu i ulovu ribe i Savezu i kantonalnom ministarstvu dostaviti godišnji izvještaj o ulovu ribe u privrednom ribolovu.

### ***Poglavlje II. Sportski ribolov***

#### **Član 23. (Sportski ribolov)**

- (1) Sportski ribolov može se obavljati u svim ribolovnim vodama, osim onih ribolovnih voda kojima je promijenjena namjena u skladu sa odredbama člana 14. stav (7) ovog Zakona.
- (2) Sportski ribolov može obavljati fizičko lice - ribolovac koji je stručno osposobljen za sportski ribolov što dokazuje uvjerenjem o položenom ribolovačkom ispitu i koji posjeduje dozvolu za lov ribe korisnika ribolovnog područja na kojem se vrši ribolov (u daljem tekstu: ribolovnu dozvolu).
- (3) Savezu se uplaćuje 10% (deset) vrijednosti izdate ribolovne dozvole, a 90% (devedeset) korisniku ribolovnog prava na određenom ribolovnom području/zoni.
- (4) Ribe ulovljene u sportskom ribolovu i zadržane u skladu s odredbama ovoga Zakona i propisa donijetih na osnovu njega, postaju vlasništvo ribolovca i ne smiju se stavljati u promet.
- (5) Federalni ministar propisuje kategorizaciju i cijenu ribolovnih dozvola, oblik i sadržaj ribolovne dozvole, te način i uslovi obavljanja sportskog ribolova, količina i vrsta ribolovnih alata i opreme, te druga pitanja vezana za sportski ribolov.

#### **Član 24. (Ribolovno pravo)**

- (1) Ribljim fondom u ribolovnim područjima ili zonama u svrhu obavljanja sportskog ribolova upravlja korisnik ribolovnog prava.

- (2) Korisnik ribolovnog prava može biti pravno lice i/ili udruženje sportskih ribolovaca (u daljem tekstu: udruženje) koje ispunjava uslove propisane ovim Zakonom.
- (3) Iznimno odredbama stava (1) ovog člana dio ribolovnog područja/zone koji je u sastavu nacionalnog parka ili drugog zaštićenog prirodnog dobra (park prirode, rezervat i dr.) koristi javna ustanova koja upravlja tim dobrima.
- (4) Ribolovno pravo dodjeljuje se putem javnog konkursa kojeg provodi kantonalno ministarstvo.
- (5) Odluku o uslovima konkursa iz stava (4) ovog člana i visinu naknade na osnovu prijedloga kantonalnog ministra i pribavljenog mišljenja općine, donosi nadležna kantonalna vlada.
- (6) Općinski organ je dužan mišljenje dati u roku od 15 dana od kada mu je zatraženo, u suprotnom će se smatrati da je isti dao pozitivno mišljenje odnosno Odluka donijeti bez pribavljenog mišljenja.
- (7) Visina godišnje naknade za ribolov iz ovog člana iznosi najmanje 200 KM.
- (8) Sredstva od dodjele ribolovnog prava su namjenska sredstva koja se dijele u omjeru Federaciji 20% (dvadeset), kantonu 40% (četrdeset) i općini 40% (četrdeset), a koriste se putem korisnika ribolovnog prava za približavanje ribolovnih voda, zaštitu i unapređenje ribljeg fonda u ribolovnom području/zoni za koje je izdato ribolovno pravo, osim namjenskih sredstava Federacije koja se koriste za izradu strateških dokumenata, izradu i realizaciju programa za razvoj ribarstva, kao i pričinjenih šteta od zaštićenih životinjskih vrsta.
- (9) Uz prijavu na konkurs lice iz stava (2) ovog člana obavezno dostavlja rješenje o registraciji djelatnosti ribolova ili rješenje o registraciji udruženja i program održivog korištenja ribolovnog područja ili zone.
- (10) Na prijedlog komisije za ribarstvo, kantonalni ministar donosi rješenje o dodjeli ribolovnog prava licu iz stava (2) ovog člana, koje ponudi najpovoljnije uslove propisane konkursom, najkasnije 30 dana od dana objavljivanja javnog konkursa.
- (11) Rješenje iz stava (10) ovog člana dostavlja se i agenciji za vode nadležnoj za vodno područje (Agencija za vodno područje rijeke Save ili Agenciji za vodno područje Jadranskog mora).
- (12) Ribolovno pravo se dodjeljuje na vremenski period od deset godina.
- (13) Dosadašnji korisnik ribolovnog prava ima, pod jednakim uslovima, pravo prvenstva u dodjeli ribolovnog prava.
- (14) Korisnik ribolovnog prava ne može ribolovno pravo ustupati ili prenositi na druga lica.
- (15) Protiv rješenja iz stava (10) ovog člana može se izjaviti žalba Federalnom ministarstvu u roku od 15 dana od dana prijema rješenja.
- (16) Kantonalni ministar može uz prethodno pribavljeno mišljenje ovlaštenog lica i saglasnost tijela koje upravlja vodama, ribolovnim vodama proglasiti i vode iznimno od odredbi člana 14. stav (5) tač. c) i d) ovog Zakona i dati ih na upravljanje korisniku ribolovnog područja/zone, kojima te vode pripadaju.
- (17) Kantonalno ministarstvo dužno je najkasnije u roku od jedne godine od dana donošenja provedbenog propisa iz člana 16. stava (7) ovog Zakona o ribolovnim vodama, ribolovnim područjima i katastru ribolovnih voda dodijeliti ribolovno pravo.
- (18) Ako kantonalno ministarstvo ne postupi u skladu sa stavom (17) ovog člana, Federalno ministarstvo će provesti postupak dodjele ribolovnog prava.



## **Član 25.**

### **(Ugovor o dodjeli ribolovnog područja ili zone na korištenje)**

- (1) Kantonalni ministar s korisnikom ribolovnog prava zaključuje ugovor o dodjeli ribolovnog područja ili zone na korištenje, kojim se utvrđuju: naziv ribolovnog područja/zone, veličina i granice ribolovnog područja/zone, mjesto, način i uslovi obavljanja ribolova, način korištenja i upravljanja ribolovnim područjem/zonom, mjere koje mora preduzimati radi zaštite ribljeg fonda i unapređenja ribarstva, visina i način plaćanja naknade za dodjelu ribolovnog područja/zone, uslovi raskidanja ugovora i oduzimanja ribolovnog prava, te drugi elementi obligaciono-pravnog karaktera.
- (2) Ugovor o dodjeli ribolovnog područja/zone na korištenje zaključuje se najkasnije u roku od 30 dana od dana izdavanja ribolovnog prava.
- (3) Korisnik ribolovnog prava obavezan je da u vremenskom roku od 90 dana od dana zaključivanja ugovora obezbijedi stručno vođenje poslova upravljanja ribolovnim područjem/zonom koje mu je dodijeljeno na korištenje.
- (4) Stručna osposobljenost za vođenje poslova upravljanja ribolovnim područjem/zonom dokazuje se uvjerenjem o položenom stručnom ispitu za ribarstvo.
- (5) U cilju zaštite i očuvanja ribljeg fonda, ribolovno područje/zona koje konkursom nije dodijeljeno na korištenje ili je isto oduzeto u skladu sa odredbama člana 26. ovog Zakona, kantonalno ministarstvo bez javnog konkursa i bez naknade dodjeljuje na privremeno korištenje korisniku ribolovnog prava u ribolovnom području koji ispunjava uslove propisane ovim Zakonom.
- (6) Korisnik ribolovnog prava kojem je dodijeljeno ribolovno područje/zona iz stava (5) ovog člana na korištenje ima ista prava i obaveze kao i u ribolovnom području/zoni za koje je dobio ribolovno pravo putem javnog konkursa.
- (7) Dodjela ribolovnog područja/zone na korištenje u smislu stava (5) ovog člana može trajati najduže jednu godinu.
- (8) Rješenje o dodjeli ribolovnog područja/zone iz stava (5) ovog člana mora se donijeti najkasnije 30 dana prije isteka roka određenog akta o privremenoj dodjeli ribolovnog područja/zone na korištenje.

## **Član 26.**

### **(Oduzimanje i prestanak važenja ribolovnog prava)**

- (1) Kantonalno ministarstvo će korisniku ribolovnog prava rješenjem oduzeti ribolovno pravo ako:
  - a) Federalnom ministarstvu ne dostavi na usvajanje privremeni program upravljanja ribolovnim područjem/zonom u propisanom roku;
  - b) ne obezbijedi stručno upravljanje ribolovnim područjem/zonom koje mu je dodijeljeno na korištenje u propisanom roku;
  - c) vidno ne označi granice ribolovnog područja/zone za koje je dobio ribolovno pravo u propisanom roku;
  - d) ne organizuje rad ribočuvarske službe u propisanom roku;
  - e) Federalnom ministarstvu ne dostavi na usvajanje Ribolovnu osnovu i Reviziju ribolovne osnove u propisanom roku;
  - f) Kantonalnom ministarstvu ne dostavi podatke neophodne za vođenje Katastra ribolovnih voda u propisanom roku;
  - g) Kantonalnom ministarstvu ne dostavi na usvajanje Godišnji program za narednu kalendarsku godinu u propisanom roku;

- h) Kantonalnom ministarstvu ne dostavi Izvještaj o realizaciji godišnjeg programa za prethodnu godinu u propisanom roku;
  - i) ne uplati iznos naknade za dodjelu ribolovnog područja/zone za narednu kalendarsku godinu u propisanom roku;
  - j) ne provodi mjere predviđene ugovorom, Ribolovnom osnovom, privremenim ili godišnjim programom;
  - k) ribolovnim područjem/zonom upravlja suprotno Ribolovnoj osnovi ili Privremenim programom upravljanja;
  - l) internom odlukom ili na drugi način ribolovno pravo ustupi ili prenese na druga pravna lica ili udruženja;
  - m) ne ispunjava propisane obaveze dostavljanja podataka;
  - n) promjeni namjenu pojedine ribolovne vode, ribolovnog područja/zone bez saglasnosti kantonalnog ministarstva.
- (2) Ako utvrdi nepravilnosti iz stava (1) ovog člana, nadležni poljoprivredni inspektor pokreće postupak za oduzimanje ribolovnog prava.
  - (3) Korisnik ribolovnog prava kojem je oduzeto ribolovno pravo u skladu s odredbama stava (1) ovog člana nema pravo na povrat materijalnih i novčanih sredstava koje je uložio u ribolovno područje/zonu.
  - (4) U slučaju promjene namjene ribolovne vode ili njenog dijela u nekom ribolovnom području/zoni u skladu sa odredbama člana 14. stav (7) ovog Zakona kantonalni ministar će odlukom oduzeti ribolovno pravo na dijelu ribolovnog područja/zone, kojem pripada ta ribolovna voda ili njen dio.
  - (5) Korisnik ribolovnog prava kojem je oduzeto ribolovno pravo u skladu s odredbama stava (4) ovog člana ima pravo od kantonalnog ministarstva potraživati povrat materijalnih i novčanih sredstava koje je uložio u dio ribolovnog područja/zone za koju mu je oduzeto ribolovno pravo.
  - (6) Protiv rješenja o oduzimanju ribolovnog prava može se izjaviti žalba Federalnom ministarstvu u roku od 15 dana od dana prijema rješenja.
  - (7) Ribolovno pravo prestaje važiti na zahtjev korisnika ribolovnog prava ili prestankom postojanja lica/udruženja iz člana 24. stav (2).

#### **Član 27.**

##### **(Programi korištenja ribolovnog područja ili zone)**

- (1) Korisnik ribolovnog prava koristi ribolovno područje/zonu u skladu sa Ribolovnom osnovom i godišnjim programom, za koje je stekao ribolovno pravo.
- (2) Do dana sticanja saglasnosti na Ribolovnu osnovu, korisnik ribolovnog prava koristi ribolovno područje ili zonu na osnovu Privremenog programa korištenja ribolovnog područja /zone (u daljem tekstu: privremeni program).
- (3) Federalni ministar propisuje sadržaj programa korištenja ribolovnim područjem ili zonom, način, uslovi izrade i provođenja programa, obrazac i sadržaj saglasnosti na programe korištenja ribolovnim područjem ili zonom, te druga pitanja vezana za programe korištenja.

#### **Član 28.**

##### **(Ribolovno-privredna osnova)**

- (1) Korisnik ribolovnog prava obavezan je donijeti Ribolovnu osnovu najkasnije u roku od jedne godine od dana zaključivanja ugovora iz člana 25. stav (1) ovog Zakona.

- (2) Saglasnost na Ribolovnu osnovu, nakon pribavljenog mišljenja kantonalnog ministarstva, daje Federalno ministarstvo, najkasnije u roku od 30 dana od dana podnošenja zahtjeva.
- (3) Saglasnost na Ribolovnu osnovu daje se na vremenski period od deset godina od dana zaključenja ugovora iz člana 25. stav (1) ovog Zakona.
- (4) Korisnik ribolovnog prava obavezan je uraditi Reviziju ribolovne osnove, najkasnije do isteka roka od pet godina od dana izdavanja saglasnosti na Ribolovnu osnovu.
- (5) Iznimno od odredbi stava (4) ovog člana Revizija ribolovne osnove radi se vanredno u slučaju izazivanja ili nanošenja štete ribljem fondu u skladu sa odredbama člana 54. ovog Zakona.
- (6) Saglasnost na Reviziju ribolovne osnove iz stava (4) i (5) ovog člana, nakon pribavljenog mišljenja kantonalnog ministarstva, daje Federalno ministarstvo, najkasnije u roku od 30 dana od dana podnošenja zahtjeva.
- (7) Ribolovnu osnovu i Reviziju ribolovne osnove izrađuje ovlašteno lice.

### **Član 29. (Godišnji program upravljanja)**

- (1) Korisnik ribolovnog prava obavezan je izraditi Godišnji program za koje je dobio ribolovno pravo u skladu sa Ribolovnom osnovom.
- (2) Godišnji program za sljedeću kalendarsku godinu korisnik ribolovnog prava dostavlja kantonalnom ministarstvu najkasnije do 1. decembra tekuće godine.
- (3) Saglasnost na Godišnji program daje kantonalno ministarstvo, uz prethodno pribavljeno mišljenje općine/općina, najkasnije u roku od 30 dana od dana podnošenja zahtjeva.
- (4) Podatke o izdatim saglasnostima iz stava (3) ovog člana kantonalno ministarstvo dostavlja Federalnom ministarstvu najkasnije do 31. marta tekuće godine.
- (5) Korisnik ribolovnog prava obavezan je kantonalnom ministarstvu dostaviti Izvještaj o realizaciji Godišnjeg programa za prethodnu godinu, najkasnije do 31. januara tekuće godine.
- (6) Korisnici susjednih ribolovnih područja ili ribolovnih zona koje se nalaze na istoj ribolovnoj vodi dužni su uskladiti svoje godišnje programe.

### **Član 30. (Privremeni program)**

- (1) Korisnik ribolovnog prava obavezan je Federalnom ministarstvu dostaviti na usvajanje privremeni program, najkasnije u vremenskom roku od 60 dana od dana zaključivanja ugovora iz člana 25. stav (1) ovog Zakona.
- (2) Saglasnost na privremeni program daje Federalno ministarstvo najkasnije u roku od 30 dana od dana podnošenja zahtjeva.
- (3) Saglasnost na privremeni program daje se na vremenski period od jedne godine od dana zaključenja ugovora iz člana 25. stav (1) ovog Zakona.
- (4) Privremeni program izrađuje ovlašteno lice.

### **Član 31. (Program održivog korištenja ribolovnog područja ili zone)**

Program održivog korištenja ribolovnog područja ili zone definiše ciljeve, načine i pravce korištenja ribljeg fonda, mjere očuvanja, zaštite i unapređenja ribljeg fonda i

ribolovnih voda, te druga pitanja vezana za ribolovno područje/zonu koje se dodjeljuje na korištenje u skladu sa odredbama člana 24. ovog Zakona.

**Član 32.**  
**(Označavanje ribolovnog područja ili zone)**

- (1) Korisnik ribolovnog prava obavezan je vidno označiti granice ribolovnog područja/zone za koju je dobio ribolovno pravo najkasnije u roku od 90 dana od dana zaključivanja ugovora iz člana 25. stav (1) ovog Zakona.
- (2) Federalni ministar propisuje načine i uslove označavanja granica ribolovnog područja/zone, posebnih staništa, ribolovnih revira i ribolovnih voda sa zabranom ribolova.

**Član 33.**  
**(Ribolovne dozvole)**

- (1) Korisnik ribolovnog prava izdaje ribolovne dozvole za ribolovno područje/zonu za koje je dobio ribolovno pravo državljanima Bosne i Hercegovine koji su položili ribolovački ispit, te stranim državljanima bez položenog ribolovačkog ispita, ukoliko love ribu na osnovu dnevne ribolovne dozvole.
- (2) Strani državljanin, kojem je izdata dnevna ribolovna dozvola u skladu s odredbama stava (1) ovog člana, može obavljati sportski ribolov samo u prisustvu punoljetnog državljanina Bosne i Hercegovine koji posjeduje ribolovnu dozvolu.
- (3) Korisnik ribolovnog prava može stranom državljaninu izdati godišnju ribolovnu dozvolu samo uz predočeno Uvjerenje o položenom ribolovačkom ispitu.
- (4) Iznimno od odredbi stava (1) ovog člana, korisnik ribolovnog prava može izdati ribolovnu dozvolu fizičkim licima koja su oslobođena polaganja ribolovačkog ispita, u skladu sa odredbama provedbenog propisa iz člana 11.
- (5) Korisnik ribolovnog prava smije izdavati samo ribolovne dozvole koje su u skladu sa odredbama provedbenog propisa iz člana 23.
- (6) Korisnik ribolovnog prava ne smije izdati ribolovnu dozvolu za tekuću godinu ribolovcu koji nije dostavio Godišnji izvještaj za prethodnu godinu.
- (7) Ribolovna dozvola koja je ovjerena od strane korisnika ribolovnog prava vrijedi samo u ribolovnom području/ zoni za koje je korisnik dobio ribolovno pravo.
- (8) Iznimno od odredbi stava (7) ovog člana ribolovna dozvola vrijedi i u ribolovnom području/zoni drugog korisnika ribolovnog prava ukoliko je korisnik ribolovnog prava koji je izdao dozvolu zaključio ugovor o recipročnom pravu s drugim korisnikom ribolovnog prava.
- (9) Korisnik ribolovnog prava obavezan je voditi evidenciju o ribolovu i ulovu ribe i Savezu i kantonalnom ministarstvu dostaviti Godišnji izvještaj o ulovu ribe u sportskom ribolovu.

**Član 34.**  
**(Isporuka ribolovnih dozvola)**

- (1) Ribolovne dozvole za slijedeću godinu Savez isporučuje korisniku ribolovnog prava putem kantonalnog ministarstva.
- (2) Dozvole iz stava (1) ovog člana isporučuju se korisniku ribolovnog prava, koji je izmirio sve obaveze prema Savezu, najkasnije do 31. decembra tekuće godine.

- (3) Korisnik ribolovnog prava obavezan je Savezu, putem kantonalnog ministarstva, dostaviti zahtjev za isporuku ribolovnih dozvola za slijedeću godinu, najkasnije do 1. decembra tekuće godine.
- (4) Korisnik ribolovnog prava može u tekućoj godini dostaviti Savezu zahtjev za isporuku dodatnih ribolovnih dozvola, ako se za istim ukaže potreba.
- (5) Savez je dužan Korisniku ribolovnog prava isporučiti dodatne ribolovne dozvole najkasnije u vremenskom roku od 30 dana od dana podnošenja zahtjeva.
- (6) Savez je obavezan Federalnom i kantonalnom ministarstvu dostaviti godišnji izvještaj o isporučenim dozvolama, najkasnije do 31. januara tekuće godine za prethodnu godinu.

### **Član 35. (Prava i obaveze ribolovaca)**

- (1) Ribolovac mora kod sebe posjedovati ribolovnu dozvolu u vrijeme obavljanja sportskog ribolova.
- (2) Lica mlađa od 14 godina mogu obavljati sportski ribolov samo u prisustvu punoljetnog lica koje posjeduje ribolovnu dozvolu.
- (3) Ribolovac je dužan omogućiti obavljanje ribočuvarskog nadzora i pružiti ribočuvaru sve potrebne podatke i obavijesti u vezi sa obavljanjem sportskog ribolova.
- (4) Ribolovac smije loviti ribe samo uz upotrebu dopuštenih ribolovnih alata, opreme i mamaca.
- (5) Ribolovac smije koristiti plovilo za obavljanje sportskog ribolova na određenoj ribolovnoj vodi samo ukoliko je to dopušteno i određeno internim aktom korisnika ribolovnog prava u skladu sa Ribolovnom osnovom.
- (6) RIBE koje nakon ulova ribolovac stavi u mrežu čuvaru smatraju se zadržanima.
- (7) RIBE zadržane u ulovu ribolovac mora upisati u ribolovnu dozvolu, najkasnije do trenutka napuštanja mjesta ribolova.
- (8) Ribolovac je obavezan voditi evidenciju o ribolovu i ulovu ribe i korisniku ribolovnog prava dostaviti Izvještaj o godišnjem ulovu.

### **Član 36. (Oduzimanje ribolovne dozvole)**

- (1) Korisnik ribolovnog prava pokreće postupak oduzimanja ribolovne dozvole i do kraja godine zabranjuje obavljanje sportskog ribolova u ribolovnom području/zoni koje mu je dodijeljeno na korištenje, ribolovcu koji ne obavlja sportski ribolov u skladu sa odredbama ovog Zakona i propisa donesenih na osnovu njega.
- (2) Postupak za oduzimanje ribolovne dozvole u skladu sa odredbama stava (1) ovog člana pokreće ribočuvar, a provode tijela korisnika ribolovnog prava.

### **Član 37. (Ribočuvarska služba)**

- (1) Korisnik ribolovnog prava je obavezan da u skladu sa ribolovnom osnovom organizuje ribočuvarsku službu, najkasnije u vremenskom periodu od 30 dana od dana zaključenja ugovora iz člana 25. stav (1) ovog Zakona.
- (2) Do dana sticanja saglasnosti na Ribolovnu osnovu, korisnik ribolovnog prava ribočuvarsku službu organizuje u skladu sa Privremenim programom.
- (3) Ribočuvarsku službu obavlja ribočuvar, kojeg imenuje korisnik ribolovnog prava.
- (4) Korisnik ribolovnog prava može za ribočuvara imenovati lice koje ima najmanje III stepen stručne spreme i da je stručno osposobljeno.

- (5) Stručna osposobljenost lica iz stava (4) ovog člana dokazuje se Uvjerenjem o položenom ribočuvarskom ispitu.
- (6) Iznimno od stava (4) ovog člana ribočuvarsku službu može obavljati lice sa nižom stručnom spremom ako je obavljalo poslove ribočuvara neprekidno u vremenu od najmanje pet godina i da je stručno osposobljeno.
- (7) Korisnik ribolovnog prava može, pored ribočuvarske službe, čuvanje ribljeg fonda organizovati i preko svojih članova kroz volonterski rad.
- (8) Federalni ministar propisuje način i uslove obavljanja ribočuvarske službe, oblik i sadržaj obrasca legitimacije, značke i izgled uniforme ribočuvara, te druga pitanja vezana za rad ribočuvarske službe.

### **Poglavlje III. Privredno-sportski ribolov**

#### **Član 38. (Privredno-sportski ribolov)**

- (1) Privredno-sportski ribolov može se obavljati na tekućim ribolovnim vodama, koje malim dijelom vodotoka, s obje obale, protiče ili se cjelokupnom površinom stajaćih ribolovnih voda nalazi na privatnom posjedu.
- (2) Privredno-sportski ribolov može obavljati pravno lice koji posjeduje dozvolu za privredno-sportski ribolov.
- (3) Federalni ministar propisuje obrazac i sadržaj dozvole za privredno-sportski ribolov, način i uslove obavljanja privredno-sportskog ribolova, kapacitet proizvodnje, te druga pitanja vezana za privredno-sportski ribolov.

#### **Član 39. (Dozvola za privredno-sportski ribolov)**

- (1) Dozvolu za privredno-sportski ribolov rješenjem daje Federalno ministarstvo, najkasnije u roku od 30 dana od dana podnošenja zahtjeva.
- (2) Uz zahtjev za izdavanje dozvole za privredno-sportski ribolov, obavezno se dostavljaju:
  - a) rješenje o registraciji za djelatnost ribolova;
  - b) tehničko-tehnološki projekat ribnjaka;
  - c) ugovor o koncesiji.
- (3) Dozvola za privredno-sportski ribolov se izdaje na vremenski period od deset godina od dana izdavanja dozvole.
- (4) Za dozvolu iz stava (1) ovog člana plaća se naknada u visini 10% (deset) od koncesione naknade, a ista se uplaćuje u Budžet Federacije kao namjenska sredstva za unapređenje privredno-sportskog ribolova.
- (5) Tehničko-tehnološki projekat ribnjaka iz stava (2) ovog člana izrađuje ovlašteno lice.
- (6) Korisnik dozvole za privredno-sportski ribolov ne može dozvolu ustupati ili prenositi na druga lica.
- (7) Korisnik dozvole za privredno-sportski ribolov smije u ribnjaku držati samo one vrste i one količine ribe koje su upisane u dozvolu za privredno-sportski ribolov.
- (8) Alohtone vrste riba smiju se u ribnjaku držati samo uz odobrenje Federalnog ministarstva.

- (9) Korisnik dozvole za privredno-sportski ribolov obavezan je voditi evidenciju o privredno-sportskom ribolovu i Federalnom ministarstvu dostaviti godišnji izvještaj o privredno-sportskom ribolovu.
- (10) Ako se rješenjem Federalnog ministarstva uskrati pravo na dozvolu za privredno-sportski ribolov, podnosilac zahtjeva može pokrenuti upravni spor kod nadležnog suda.
- (11) U slučaju izmjene podataka na osnovu kojih je izdata dozvola za privredno-sportski ribolov korisnik dozvole je obavezan predati zahtjev za izdavanje nove dozvole.
- (12) Odredbe ovoga člana odnose se i na rakove, školjke, žabe i druge vodene organizme.

#### **Član 40.**

##### **(Oduzimanje dozvole i prestanak važenja dozvole)**

- (1) Federalno ministarstvo će korisniku dozvole za privredno-sportski ribolov rješenjem oduzeti dozvolu ako:
  - a) dozvolu za privredno-sportski ribolov ustupi ili prenese na drugo pravno ili fizičko lice;
  - b) u ribnjaku drži vrste ili količine riba i drugih vodenih organizama koje nisu upisane u dozvoli za privredno-sportski ribolov;
  - c) u ribnjaku drži alohtone vrsta riba i drugih vodenih organizama bez odobrenja Federalnog ministarstva;
  - d) Federalnom ministarstvu ne dostavi godišnji izvještaj o privredno-sportskom ribolovu u propisanom roku;
  - e) se nakon izdavanja dozvole za privredno-sportski ribolov administrativnom provjerom ili inspekcijskim nadzorom utvrdi da je ista izdata na osnovu netačnih podataka;
  - f) se ne pridržava propisanih uslova zaštite ribe i prirode ili ne ispunjava uslove, odnosno obaveze propisane ovim Zakonom;
  - g) se uz novčanu kaznu za prekršaj izrekne i zaštitna mjera zabrane djelatnosti ribolova;
  - h) prestane da ispunjava ostale uslove propisane ovim Zakonom.
- (2) Ako utvrdi nepravilnosti iz stava (1) ovog člana, federalni poljoprivredni inspektor pokreće postupak za oduzimanje dozvole za privredno-sportski ribolov.
- (3) Protiv rješenja o oduzimanju dozvole za privredno-sportski ribolov nije dopuštena žalba, ali se može pokrenuti upravni spor kod nadležnog suda.
- (4) Pokretanje upravnog spora ne odgađa izvršenje rješenja.
- (5) Dozvola za privredno-sportski ribolov prestaje važiti na zahtjev korisnika dozvole ili prestankom postojanja lica iz člana 38. stav (2).

#### ***Poglavlje IV. Posebni vidovi ribolova***

#### **Član 41.**

##### **(Posebni vidovi ribolova)**

- (1) U ribolovnim vodama mogu se obavljati i drugi, posebni vidovi ribolova:
  - a) ribolov za naučno-istraživačke svrhe;
  - b) selektivni ribolov;
  - c) sanacioni ribolov;

- (2) Posebne vidove ribolova može obavljati ovlašteno lice koje posjeduju dozvolu za ribolov za naučno-istraživačke svrhe, selektivni ili sanacioni ribolov.
- (3) Dozvolu za obavljanje ribolova iz stava (1) ovog člana izdaje Federalno ministarstvo, najkasnije 30 dana od dana prijema zahtjeva.
- (4) Uz zahtjev za izdavanje dozvole za obavljanje ribolova iz stava (1) ovog člana, obavezno se dostavljaju istraživački program ili projekat, ugovor o obavljanju naučnih i stručnih poslova u oblasti slatkovodnog ribarstva.
- (5) Dozvola iz stava (3) ovog člana izdaje se najduže za vremenski period od jedne kalendarske godine, s mogućnošću produžavanja iste, u toku realizacije istraživačkog programa ili trajanja ugovora o obavljanju naučnih i stručnih poslova u oblasti slatkovodnog ribarstva.
- (6) Korisnik dozvole za ribolov iz stava (1) ovog člana ne može dozvolu ustupati ili prenositi na druga lica.
- (7) Korisnik dozvole za ribolov iz stava (1) ovog člana mora imati dozvolu uz sebe prilikom obavljanja ribolova.
- (8) Korisnik dozvole za ribolov iz stava (1) ovog člana smije, pored dozvoljenih ribolovnih alata i pribora, koristiti i specijalnu opremu (elektroagregat, ehosonar, mreže, vrše, i sl.) tokom obavljanja ribolova.
- (9) Protiv rješenja o uskraćivanju dozvole za obavljanje ribolova iz stava (1) ovog člana nije dopuštena žalba, ali se može pokrenuti upravni spor kod nadležnog suda.
- (10) Pokretanje upravnog spora ne odgađa izvršenje rješenja.
- (11) Federalni ministar propisuje obrazac i sadržaj dozvole za poseban vid ribolova, način i uslovi dobijanja dozvola za ribolov u naučno-istraživačke svrhe, selektivni i sanacioni ribolov, način i uslovi obavljanja ribolova u naučno-istraživačke svrhe, selektivnog i sanacionog ribolova, te druga pitanja vezana za posebne oblike ribolova.

## **DIO ČETVRTI - AKVAKULTURA**

### **Član 42. (Akvakultura)**

- (1) Akvakultura se može obavljati u svim ribolovnim vodama, pod uslovom da se ne ugrožava i ne mijenja prvobitno stanje vodnog sistema i vodenih organizama.
- (2) Akvakulturu može obavljati pravno lice koje posjeduje dozvolu za akvakulturu.
- (3) Fizičko lice u pravnom licu mora biti stručno osposobljeno za obavljanje poslova u akvakulturi.
- (4) Stručna osposobljenost lica iz stava (3) dokazuje se uvjerenjem o položenom ispitu za akvakulturu.
- (5) Federalni ministar propisuje obrazac zahtjeva za izdavanje dozvole za akvakulturu, sadržaj dozvole za akvakulturu, način i uslove obavljanja akvakulture, kapacitet proizvodnje, i dr. vezana za akvakulturu.



## **Poglavlje I. Dozvola za akvakulturu**

### **Član 43. (Dozvola za akvakulturu)**

- (1) Federalni ministar donosi rješenje o davanju dozvole za obavljanje akvakulture pravnim licima uz naknadu, na osnovu provedenog javnog konkursa u skladu sa odredbama ovog zakona i Zakona o koncesijama ("Službene novine Federacije BiH", broj 40/02).
- (2) Uz zahtjev za izdavanje dozvole za akvakulturu obavezno se dostavlja:
  - a) rješenje o registraciji za djelatnost akvakulture;
  - b) tehničko-tehnološki projekat ribogojilišta;
  - c) ugovor o koncesiji za uzgoj ribe - akvakultura.
  - d) akt kojim se dokazuje da izgrađeni ili rekonstruirani objekat udovoljava propisanim veterinarsko-zdravstvenim uslovima;
  - e) akt kojim se ostvaruje pravo korištenje kopnenih voda za potrebe obavljanja djelatnosti akvakulture sukladno posebnom propisu o vodama, odnosno posebnom propisu o poljoprivrednom zemljištu;
  - f) kopiju odgovarajućeg akta kojim se dokazuje da obavljanje djelatnosti akvakulture nije u suprotnosti s namjenom prostora, u skladu posebnim propisima o prostornom uređenju i gradnji, te iz područja zaštite okoliša i prirode;
  - g) dokaz o vlasništvu u slučaju da se obavljanje djelatnosti akvakulture vrši na privatnom zemljištu;
  - h) popis vrsta vodenih organizama koji će se uzgajati, sa latinskim nazivima.
- (3) Dozvola za akvakulturu se izdaje na vremenski period od deset godina računajući od dana izdavanja dozvole.
- (4) Za dozvolu iz stava (3) ovog člana plaća se naknada u visini 10% (deset) od koncesione naknade, a ista se uplaćuje u Budžet Federacije kao namjenska sredstva za unapređenje akvakulture.
- (5) Tehničko-tehnološki projekat iz stava (2) tačka b) ovog člana izrađuje ovlašteno lice.
- (6) Korisnik dozvole za akvakulturu ne može dozvolu ustupati ili prenositi na drugo lice.
- (7) Korisnik dozvole za akvakulturu obavezan je obezbijediti stručno vođenje poslova akvakulture, najkasnije u vremenskom roku od šest mjeseci od dana izdavanja dozvole.
- (8) Korisnik dozvole za akvakulturu smije u ribogojilištu držati i uzgajati samo one vrste i one količine ribe koje su upisane u dozvolu za akvakulturu.
- (9) Korisnik dozvole za akvakulturu obavezan je voditi evidenciju o akvakulturi i Federalnom ministarstvu dostaviti godišnji izvještaj o akvakulturi.
- (10) Ako se rješenjem Federalnog ministarstva uskrati pravo na dozvolu za akvakulturu, podnosilac zahtjeva može pokrenuti upravni spor kod nadležnog suda.
- (11) U slučaju izmjene podataka na osnovu kojih je izdata dozvola za akvakulturu korisnik dozvole je obavezan predati zahtjev za izdavanje nove dozvole za akvakulturu.
- (12) Odredbe ovoga člana odnose se i na uzgoj rakova, školjki, žaba i drugih vodenih organizme.

#### **Član 44.**

##### **(Odobrenje za uzgoj autohtonih i alohtonih vrsta riba)**

- (1) Uzgoj autohtonih vrsta riba za poribljavanje ribolovnih voda može obavljati korisnik dozvole za akvakulturu koji posjeduje odobrenje za uzgoj autohtonih vrsta riba.
- (2) Iznimno od odredbi stava (1) ovog člana, uzgoj mlađi autohtonih vrsta riba može obavljati i korisnik ribolovnog prava, ako je to propisano ribolovnom osnovom.
- (3) Uvoz alohtonih vrsta riba i oplodene ikre kao i uzgoj može obavljati korisnik dozvole za akvakulturu koji posjeduje odobrenje za uvoz i uzgoj alohtonih vrsta riba.
- (4) Odobrenje za uzgoj riba u skladu s odredbama st. (1), (2) i (3) ovog člana, izdaje Federalno ministarstvo, najkasnije u vremenskom roku 30 dana od dana podnošenja zahtjeva.
- (5) Uz zahtjev za izdavanje odobrenja za uzgoj riba iz stava (4) ovog člana obavezno se dostavljaju uzgojni program i ugovor o monitoringu uzgojnog programa.
- (6) Odobrenja za uzgoj riba iz stava (4) ovog člana se izdaje na vremenski period od pet godina od dana izdavanja odobrenja.
- (7) Uzgojni program izrađuje ovlašteno lice.
- (8) Korisnik odobrenja za uzgoj riba iz stava (4) ovog člana ne može odobrenje ustupati ili prenositi na drugo lice.
- (9) Korisnik odobrenja za uzgoj riba iz stava (4) ovog člana smije u ribogojilištu držati samo one vrste ribe koje su upisane u odobrenje.
- (10) Korisnik ribolovnog prava smije uzgajati mlađ samo onih vrsta riba koje žive u ribolovnim vodama za koje je dobio ribolovno pravo.
- (11) Ako se rješenjem Federalnog ministarstva uskrati pravo na odobrenje za uzgoj riba iz stava (4) ovog člana, podnosilac zahtjeva može pokrenuti upravni spor kod nadležnog suda.
- (12) Odredbe ovoga člana odnose se i na rakove, školjke, žabe i druge vodene organizme.

#### **Član 45.**

##### **(Oduzimanje i prestanak važenja dozvole za akvakulturu)**

- (1) Federalno ministarstvo će korisniku dozvole rješenjem oduzeti dozvolu za akvakulturu ako:
  - a) dozvolu ustupi ili prenese na drugo lice ili omogući da drugo lice obavlja djelatnost akvakulture na osnovu izdate dozvole;
  - b) ne obezbijedi stručno vođenje poslovima akvakulture u propisanom roku iz člana 43. stava (7) ovog Zakona.
  - c) uzgaja vrste ili količine riba koje nisu upisane u dozvoli za akvakulturu;
  - d) obavlja akvakulturu na način i pod uslovima koji nisu u skladu sa ovim Zakonom i propisima donijetim na osnovu njega;
  - e) Federalnom ministarstvu ne dostavi Godišnji izvještaj o akvakulturi u propisanom roku;
  - f) se nakon izdavanja dozvole za akvakulturu administrativnom provjerom ili inspekcijskim nadzorom utvrdi da je ista izdata na osnovu netačnih podataka;
  - g) se ne pridržava propisanih uslova zaštite ribe i prirode ili ne ispunjava uslove, odnosno obaveze propisane ovim Zakonom ili ne gazduje u skladu sa Ribarskom osnovom;

- h) se uz novčanu kaznu za prekršaj izrekne i zaštitna mjera zabrane djelatnosti uzgoja;
  - i) prestane da ispunjava ostale uslove propisane ovim Zakonom.
- (2) Ako utvrdi nepravilnosti iz stava (1) ovog člana, postupak za oduzimanje dozvole za akvakulturu pokreće federalni poljoprivredni inspektor.
- (3) Protiv rješenja o oduzimanju dozvole za akvakulturu nije dopuštena žalba, ali se može pokrenuti upravni spor kod nadležnog suda.
- (4) Pokretanje upravnog spora ne odgađa izvršenje rješenja.

**Član 46.**  
**(Prestanak važenja dozvole za akvakulturu)**

Dozvola za akvakulturu prestaje važiti:

- a) istekom roka važenja dozvole za akvakulturu;
- b) oduzimanjem dozvole za akvakulturu iz člana 45. ovog Zakona;
- c) prestankom postojanja pravnog lica;
- d) prestankom obavljanja djelatnosti akvakulture;
- e) na zahtjev korisnika dozvole.

***DIO PETI - ZAŠTITA, OČUVANJE I UNAPRJEĐENJE RIBLJEG FONDA***

***Poglavlje I. Poribljavanje i premještanje ribe***

**Član 47.**  
**(Zaštita, očuvanje i unaprjeđenje ribljeg fonda)**

- (1) Radi zaštite, očuvanja i unaprjeđenja ribljeg fonda Federalni ministar propisuje obrazac i sadržaj saglasnosti o proglašenju posebnog staništa, posebne ribolovne staze i ribolovne vode sa zabranom ribolova, poribljavanje ribolovnih voda, premještanja ribljeg fonda, način i uslovi formiranja i korištenja posebnih staništa, posebnih ribolovnih staza i ribolovnih voda sa, zabranom ribolova, lovostaj, količina i vrste riba u ulovu, te druga pitanja u vezi sa zaštitom, očuvanjem i unaprjeđenjem ribljeg fonda.
- (2) U slučaju narušene prirodne ravnoteže u ribolovnim vodama, nastale pod utjecajem prirodnih ili drugih pojava, federalni ministar će provedbenim propisom iz stava (1) ovog člana utvrditi posebne mjere.

**Član 48.**  
**(Poribljavanje ribolovnih voda)**

- (1) Korisnik ribolovnog prava obavezan je poribljavati ribolovne vode.
- (2) Poribljavanje ribolovnih voda provodi se u cilju očuvanja brojnosti autohtonih populacija riba i ukupne ihtiopopulacije u ribolovnim vodama, a da se pri tome ne ugrozi ekološka ravnoteža ostalih vodenih organizama.
- (3) Poslove poribljavanja ribolovnih voda obavlja korisnik ribolovnog prava u ribolovnom području/zoni za koje je dobio ribolovno pravo, u skladu s Ribolovnom osnovom i Programom revitalizacije.
- (4) Ribolovne vode mogu se poribljavati samo autohtonim vrstama riba, utvrđenih genetskih karakteristika.

- (5) Ribolovne vode smiju se poribljivati ribom svih uzrasnih kategorija ili oplodjenom ikrom, koja potječe iz ribogojilišta koje posjeduje odobrenje za uzgoj autohtonih vrsta riba, i zdravom ribom u skladu sa odredbama Zakona o veterinarstvu („Službene novine Federacije BiH“, broj 46/00).
- (6) Radi zaštite ribe, riblje mladi i ikre, unijetih u ribolovnu vodu kroz poribljavanje, korisnik ribolovnog prava dužan je uvesti zabranu ribolova u poribljenom području u trajanju od najmanje 15 dana nakon poribljavanja.
- (7) Troškove nabavke ribe i organizacije poribljavanja ribolovnih voda snosi korisnik ribolovnog prava.
- (8) Poribljavanje ribolovnih voda se obavlja isključivo u prisustvu Komisije za ribarstvo i stručno osposobljene osobe korisnika ribolovnog prava.
- (9) Nadzor nad poribljavanjem obavljaju kantonalni poljoprivredni i veterinarski inspektori.
- (10) Korisnik ribolovnog prava obavezan je kantonalnom ministarstvu dostaviti izvještaj o poribljavanju ribolovnog područja/zone, najkasnije do 31. decembra tekuće godine.
- (11) Kantonalno ministarstvo obavezno je dostaviti Federalnom ministarstvu Godišnji izvještaj poribljavanja ribolovnih voda, najkasnije do 28. februara tekuće godine za prethodnu godinu.

#### **Član 49.**

##### **(Premještanje ribljeg fonda u cilju njegove zaštite)**

- (1) U slučaju trajnog narušavanja fizičkih, hemijskih ili bioloških osobina ribolovnih voda ili ako postoji opravdana sumnja da će do takvih promjena doći, korisnik ribolovnog prava obavezan je preduzeti mjere premještanja ribljeg fonda u druge ribolovne vode.
- (2) U slučaju elementarnih nepogoda (poplava, suša i sl.) korisnik ribolovnog prava obavezan je preduzeti mjere čuvanja, spašavanja i premještanja ribe.
- (3) Odobrenje za premještanje ribljeg fonda u skladu s odredbama st. (1) i (2) ovog člana, urgentno izdaje Federalno ministarstvo po saznanju/informaciji od korisnika ribolovnog prava, a pisani dokument verifikacije usmeno datog odobrenja najkasnije u vremenskom roku od tri dana od dana prijema zahtjeva.
- (4) Odobrenje za premještanje ribljeg fonda izdaje Federalno ministarstvo, najkasnije 30 dana od dana prijema zahtjeva.
- (5) Premještanje ribljeg fonda u skladu s odredbama st. (1) i (2) ovog člana obavlja korisnik ribolovnog prava, uz stručnu i tehničku pomoć ovlaštenog lica.
- (6) Ovlašteno lice i korisnik ribolovnog prava dužni su sačiniti izvještaj o obavljenom premještanju i dostaviti ga Federalnom ministarstvu, najkasnije 30 dana od dana premještanja ribljeg fonda.
- (7) U slučaju planiranog ispuštanja akumulacija, vlasnik ili korisnik akumulacije obavezan je napraviti elaborat o spašavanju ribljeg fonda, te korisniku ribolovnog prava nadoknaditi štetu pričinjenu ribljem fondu u skladu s odredbama člana 54. st. (3), (4), (5), (6) i (7) ovog Zakona.
- (8) Elaborat iz stava (7) ovog člana izrađuje ovlašteno lice.

## **Poglavlje II. Posebna staništa i ribolovne vode sa posebnim režimom ribolova**

### **Član 50. (Posebna staništa)**

- (1) Korisnik ribolovnog prava može pojedine ribolovne vode ili njihove dijelove organizovati kao posebno stanište u skladu sa Ribolovnom osnovom.
- (2) Posebnim staništima smatraju se:
  - a) riblja plodišta (prirodna riblja mrjestilišta);
  - b) uzgojni potoci (riblja rastilišta);
  - c) zimovališta;
  - d) migratorni putevi riba.
- (3) Saglasnost o proglašenju posebnog staništa, na osnovu zahtjeva korisnika ribolovnog prava rješenjem daje Federalno ministarstvo, najkasnije 30 dana od dana podnošenja zahtjeva.
- (4) Korisnik ribolovnog prava obavezan je vidno označiti granice posebnog staništa, najkasnije u roku od 30 dana od dana donošenja rješenja iz stava (3) ovog člana.
- (5) U posebnim staništima trajno je zabranjen ribolov.
- (6) Iznimno odredbama stava (5) ovog člana vrijeme zabrane ribolova u zimovalištima određuje se Ribolovnom osnovom.
- (7) Iznimno odredbama stava (5) ovog člana, Federalni ministar može odobriti obavljanje naučno-istraživačkog, sanacionog i selektivnog ribolova.
- (8) U posebnom staništu zabranjeno je vaditi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se i kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe.
- (9) U toku sezone mrijesta u posebnim staništima zabranjeno je vršiti i druge radnje i zahvate i provoditi aktivnosti koje ometaju migraciju i mrijest riba.
- (10) Iznimno odredbama stava (5) ovog člana, u posebnim staništima, osim u toku sezone mrijesta, mogu se provoditi aktivnosti u skladu s odredbama čl. 85. i 86. Zakona o vodama, radi smanjenja ili sprečavanja ugroženosti ljudi i materijalnih dobara od štetnog djelovanja voda (poplave, bujice, erozije i sl.) i otklanjanje posljedica njihovog djelovanja.
- (11) Saglasnost za provođenje aktivnosti u skladu sa odredbama stava (10) ovog člana daje Federalni ministar.
- (12) Agencije za vode nadležne za vodno područje (Agencija za vodno područje rijeke Save ili Agencija za vodno područje Jadranskog mora) dužne su, prije početka bilo kakvih aktivnosti u posebnom staništu, upoznati korisnika ribolovnog prava sa planiranim aktivnostima, kako bi isti mogao pravovremeno preduzeti mjere zaštite ribljeg fonda.
- (13) Iznimno u slučaju proglašenja stanja elementarnih nepogoda ne primjenjuju se st. (7), (9), (10) i (11), a iz stava (8) ovog člana može se vaditi šljunak, pijesak, kamen, panjeve i bilo koje druge materijale, koristiti čamac ili druga plovila i zahvatati ili crpiti voda.

### **Član 51. (Posebne ribolovne staze)**

- (1) Korisnik ribolovnog prava može pojedine ribolovne vode ili njihove dijelove organizovati kao posebne ribolovne staze u skladu sa Ribolovnom osnovom.

- (2) Posebnim ribolovnim stazama smatraju se:
  - a) ribolovni reviri;
  - b) mušičarske staze;
  - c) šaranaške staze;
  - d) druge specijalizovane staze;
- (3) Saglasnost o proglašenju posebne ribolovne staze, na osnovu zahtjeva korisnika ribolovnog prava izdaje nadležno kantonalno ministarstvo najkasnije 30 dana od dana podnošenja zahtjeva.
- (4) Korisnik ribolovnog prava obavezan je vidno označiti granice posebne ribolovne staze, najkasnije u roku od 30 dana od dana donošenja odluke o proglašenju posebne ribolovne staze.
- (5) U posebnoj ribolovnoj stazi dozvoljen je sportski ribolov po posebnom ribolovnom režimu.
- (6) Režim ribolova u posebnoj ribolovnoj stazi određuje korisnik ribolovnog prava internim aktima, u skladu sa Ribarskom osnovom.
- (7) U posebnim ribolovnim stazama zabranjeno je vaditi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se, kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe.
- (8) Iznimno odredbama stava (7) ovog člana, osim u vrijeme lovostaja, u posebnim ribolovnim stazama mogu se provoditi aktivnosti u skladu s odredbama čl. 85. i 86. Zakona o vodama, radi smanjenja ili sprečavanja ugroženosti ljudi i materijalnih dobara od štetnog djelovanja voda (poplave, bujice, erozije i sl.) i otklanjanje posljedica njihovog djelovanja.
- (9) Saglasnost za provođenje aktivnosti u skladu sa odredbama stava (8) ovog člana daje nadležni kantonalni ministar.
- (10) U skladu sa odredbama st. (7) i (8) ovog člana, agencije za vode nadležne za vodno područje (Agencija za vodno područje rijeke Save ili Agencija za vodno područje Jadranskog mora) dužne su, prije početka bilo kakvih aktivnosti u posebnoj ribolovnoj stazi, upoznati korisnika ribolovnog prava sa planiranim aktivnostima, kako bi isti mogao pravovremeno preduzeti mjere zaštite ribljeg fonda od tih aktivnosti.
- (11) Iznimno u slučaju proglašenja stanja elementarnih nepogoda ne primjenjuju se st. (8) i (9), a iz stava (7) ovog člana može se vaditi šljunak, pijesak, kamen, panjeve i bilo koje druge materijale, koristiti čamac ili druga plovila i zahvatati ili crpiti voda.

## **Član 52.**

### **(Ribolovna voda sa zabranom ribolova)**

- (1) U cilju obnove ribljeg fonda, korisnik ribolovnog prava može u pojedinim ribolovnim vodama ili njihovim dijelovima odrediti privremenu ili trajnu zabranu ribolova ukoliko je to predviđeno Ribolovnom osnovom.
- (2) Saglasnost o proglašenju ribolovne vode sa zabranom ribolova, na osnovu zahtjeva korisnika ribolovnog prava rješenjem daje Federalno ministarstvo, najkasnije 30 dana od dana podnošenja zahtjeva.
- (3) Korisnik ribolovnog prava obavezan je vidno označiti granice ribolovne vode sa zabranom ribolova, najkasnije u roku od 30 dana od dana izdavanja rješenja o proglašenju ribolovne vode sa zabranom ribolova.

- (4) Iznimno odredbama stava (1) ovog člana, Federalni ministar može odobriti obavljanje naučno-istraživačkog, sanacionog i selektivnog ribolova.
- (5) U ribolovnim vodama sa zabranom ribolova zabranjeno je vaditi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se, kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe.
- (6) Iznimno odredbama stava (5) ovog člana, osim u toku sezone mrijesta, u ribolovnoj vodi sa zabranom ribolova mogu se provoditi aktivnosti u skladu s odredbama čl. 85. i 86. Zakona o vodama, radi smanjenja ili sprečavanja ugroženosti ljudi i materijalnih dobara od štetnog djelovanja voda (poplave, bujice, erozije i sl.) i otklanjanje posljedica njihovog djelovanja.
- (7) Saglasnost za provođenje aktivnosti u skladu sa odredbama stava (6) ovog člana daje Federalni ministar.
- (8) U skladu sa odredbama st. (5) i (6) ovog člana, agencije za vode nadležne za vodna područja (Agencija za vodno područje rijeke Save ili Agencija za vodno područje Jadranskog mora) dužne su, prije početka bilo kakvih aktivnosti u ribolovnoj vodi sa zabranom ribolova, upoznati korisnika ribolovnog prava sa planiranim aktivnostima, kako bi isti mogao pravovremeno preduzeti mjere zaštite ribljeg fonda od tih aktivnosti.

### **Poglavlje III. Zabrane ribolova**

#### **Član 53. (Zabrane ribolova)**

- (1) Zabranjeno je:
  - a) loviti ribu bez ribolovne dozvole ili važeće ribolovne dozvole;
  - b) loviti ribu u posebnim staništima i ribolovnim vodama sa zabranom ribolova;
  - c) za vrijeme lovostaja loviti i zadržavati ribu neposredno nakon ostvarivanja ulova u sportskom ribolovu, loviti i zadržavati ribu nakon ulova, odnosno sortiranja na plovilu ili kopnu u privrednom ribolovu, prevoziti, skladištiti, prerađivati, izlagati, prodavati, stavljati u promet ribu;
  - d) ispod minimalne i maksimalne propisane veličine loviti i zadržavati ribu neposredno nakon ostvarivanja ulova u sportskom ribolovu, loviti i zadržavati ribu nakon ulova odnosno sortiranja na plovilu ili kopnu u privrednom ribolovu, prevoziti, skladištiti, prerađivati, izlagati, prodavati, stavljati u promet ribu;
  - e) ribu ulovljenu u sportskom ribolovu stavljati u promet;
  - f) loviti ribu s mosta i objekata koji se nalaze na ili iznad vodene površine i koji nisu udaljeni više od dva metra od obale;
  - g) loviti ribu iz plovila kod obavljanja sportskog ribolova, osim ukoliko to nije određeno i dopušteno internim aktom korisnika ribolovnog prava na određenoj ribolovnoj vodi u skladu sa Ribolovnom osnovom;
  - h) loviti ribu u depresijama, barama, poplavljenim površinama i drugim vodenim površinama koje nastaju povlačenjem vode;
  - i) loviti ribu u ribolovnim vodama uz upotrebu strane riblje vrste (žive ili mrtve) kao mamca;

- j) loviti ribu s više ribolovnih alata ili opreme nego što je dozvoljeno odredbama ovog Zakona i propisima donesenim na osnovu njega;
- k) loviti ribu podvodnom puškom, ostima, harpunima i drugim nedopuštenim alatima i priborom;
- l) loviti ribu mrežama, vršama, parangalima ili drugim profesionalnim ribarskim alatima i priborom, osim na vodama gdje je upotreba tih alata i sredstava dozvoljena za obavljanje privrednog ribolova u skladu sa odredbama ovog Zakona i obavljanja ribolova u skladu s odredbama člana 41. ovog Zakona;
- m) loviti ribu strujom visokog napona ili agregatima za elektroribolov, osim obavljanja ribolova u skladu s odredbama člana 41. ovog Zakona;
- n) u ribolovu koristiti ehosonar i druge elektronske uređaje, osim obavljanja ribolova u skladu s odredbama člana 41. ovog Zakona;
- o) loviti ribu noću, osim ukoliko to nije određeno i dopušteno internim aktom korisnika ribolovnog prava u skladu sa ribolovnom osnovom;
- p) loviti ribu eksplozivnim ili hemijskim sredstvima koja ih ubijaju, truju ili omamljuju;
- r) na bilo koji način sprječavati povratak riba s poplavljenog područja u vodotoke, loviti ribu sredstvima koja sprječavaju povratak riba s poplavljenog područja te sprječavati bilo koja druga migratorna kretanja riba;
- s) loviti ribu u virovima, barama, rukavcima, i dr. koji su zbog niskog vodostaja odvojeni od glavnog vodotoka ili kroz njih ne teče vodotok.
- t) loviti ribu direktno rukom, povlačenjem i kaćanjem udicom s vanjske strane tijela ribe;
- u) loviti ribu unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta;
- v) loviti ribu 100 metara uzvodno i nizvodno od ograde objekata akvakulture;
- z) provoditi ribolov radi obavljanja naučnih i stručnih poslova u oblasti slatkovodnog ribarstva bez odgovarajućeg ovlaštenja;
- aa) obavljati ribolov u naučno-istraživačke svrhe, selektivni i sanacioni ribolov bez odgovarajuće dozvole;
- bb) poribljavati ribolovne vode ili premještati ribe suprotno odredbama ovog Zakona i propisima donijetim na osnovu njega;
- cc) ometati postavljanje znakova ili skidati znakove kojima se označava ribolovno područje/zona, posebno stanište, posebne ribolovne staze i ribolovne vode sa zabranom ribolova;
- dd) na ribolovnoj vodi ili neposredno uz nju nositi ili posjedovati u vozilu ili plovilu otrovne, nagrizajuće ili omamljujuće materije, eksplozivna sredstva, materije koje u kombinaciji s drugim materijama mogu proizvesti eksploziju, mreže, vrše, parangale podvodne puške, osti, harpune, uređaje za ribolov električnom strujom ili druga nedopuštena sredstva;
- ee) uz ribolovnu vodu ili u plovilu ostavljati ribolovni alat ili opremu ili ulov bez nadzora i osiguranja vlasnika istoga;
- ff) prati vozila, kupati stoku i kućne ljubimce u ribolovnoj vodi uz upotrebu štetnih i opasnih sredstava.

(2) Odredbe stava (1) tač. b) i c) ovog člana ne odnose se na ribe iz akvakulture.



## **Poglavlje IV. Nadoknada štete pričinjene ribljem fondu i Program revitalizacije**

### **Član 54.**

#### **(Nadoknada štete pričinjene ribljem fondu)**

- (1) Pravno, fizičko i svako drugo lice, koje svojim aktivnostima u ribolovnoj vodi ili u području ribolovne vode naruši zdravlje ili ugrozi život riba, odnosno izazove ili pričini štetu ribljem fondu dužno je korisniku ribolovnog prava nadoknaditi štetu, najkasnije u roku od jedne godine od dana utvrđivanja štete.
- (2) Korisnik ribolovnog prava ima pravo na nadoknadu štete na cijelom toku ribolovne vode, nizvodno od mjesta provođenja aktivnosti kojom je pričinjena šteta ribljem fondu.
- (3) Štetu pričinjenu ribljem fondu u ribolovnoj vodi konstatuje nadležni poljoprivredni i vodni inspektor i nalaže korisniku ribolovnog prava daljnju proceduru utvrđivanja štete u skladu sa ovim Zakonom i propisima donesenim na osnovu njega.
- (4) Postojanje i obim štete pričinjene ribljem fondu u skladu sa odredbama stava (1) ovog člana utvrđuje se na osnovu Revizije ribolovne osnove za ribolovne vode na kojima je pričinjena šteta u skladu s odredbama člana 28. st. (5) i (6) ovog Zakona.
- (5) Na zahtjev korisnika ribolovnog prava, Reviziju ribolovne osnove u skladu sa odredbama stava (3) ovog člana izrađuje ovlašteno lice.
- (6) Troškove izrade Revizije ribolovne osnove snosi lice koje je izazvalo ili pričinilo štetu ribljem fondu.
- (7) Visina štete pričinjene ribljem fondu u skladu s odredbama st. (1) i (2) ovog člana određuju se na osnovu odštetnog cjenovnika koji će biti određen provedbenim propisom iz stava (9) ovog člana.
- (8) Novčana sredstva ostvarena na osnovu nadoknade štete pričinjene ribljem fondu prihod su korisnika ribolovnog prava i mogu se koristiti isključivo za otklanjanje i sanaciju nastale štete.
- (9) Federalni ministar propisuje način, uslove postojanja, metodologija utvrđivanja štete i visina štete, odštetni cjenovnik, način i uslovi otklanjanja štete i stvaranja uslova u ribolovnoj vodi prije nanošenja štete, Program revitalizacije, te druga pitanja vezana za štetu pričinjenu ribljem fondu.
- (10) Odredbe ovoga člana odnose se i na rakove, školjke, žabe i druge vodene organizme.
- (11) Odredbe ovoga člana odnose se i na nezakonit ulov ribe u skladu s odredbama člana 53. ovog Zakona ili bilo koje druge aktivnosti suprotno odredbama ovog Zakona i propisa donesenim na osnovu njega.

### **Član 55.**

#### **(Pregrađivanje ribolovnih voda i riblje staze)**

- (1) Vodotok u ribolovnoj vodi ne smije se pregrađivati.
- (2) Iznimno od stava (1) ovog člana, na vodotoku može biti izgrađena privremena ili stalna pregrada (u daljem tekstu: brana) samo na osnovu odgovarajuće dozvole i saglasnosti u skladu s odredbama Zakona o vodama i propisa donesenih na osnovu njega.
- (3) Izgradnjom brane u skladu s odredbama stava (2) ovog člana ne smije se sprječavati slobodan prolaz - migracija riba.
- (4) Slobodan i kontinuiran prolaz riba ostvaruje se projektovanjem i izgradnjom migracionog puta za ribe (u daljem tekstu: riblja staza).

- (5) Korisnik postojeće brane, koja sprječava slobodan i kontinuiran prolaz riba, dužan je izgraditi riblju stazu, najkasnije u vremenskom roku od dvije godine od dana objavljivanja ovog Zakona.
- (6) Riblja staza mora postojati i biti u funkciji od dana pripremnih radova i početka izgradnje do dana prestanka rada brane.
- (7) Po prestanku rada brane, brana mora biti odstranjena sa ribolovne vode, a ribolovna voda dovedena u stanje od prije izgradnje brane, najkasnije u vremenskom roku od jedne godine.
- (8) Ako korisnik brane iz stava (5) ili korisnik brane iz stava (2) ovog člana iz tehničkih razloga ne izgradi riblju stazu, obavezan je korisnicima ribolovnog prava nadoknaditi štetu pričinjenu ribljem fondu na cijelom toku ribolovne vode koja je pregrađena, u skladu s odredbama člana 54. st. (3), (4), (5), (6), (7) i (8) ovog Zakona.
- (9) Nadoknada štete u skladu s odredbama stava (8) ovog člana izmiruje se korisniku ribolovnog prava trajno svake godine, sve dok se ne ispune uslovi u skladu s odredbama st. (6) i (7) ovog člana.
- (10) Na zahtjev korisnika ribolovnog prava korisnik brane je dužan obezbijediti pristup ribljim stazama.
- (11) Ukoliko korisnik ribolovnog prava uoči eventualne nepravilnosti u radu i funkcionalnosti riblje staze o istom će odmah obavijestiti nadležnog kantonalnog inspektora.
- (12) Korisnici dovodnih, odvodnih, turbinskih i drugih kanala obavezni su posjedovati i održavati u funkciji uređaje koji onemogućavaju ulazak ribe iz ribolovnih voda u te kanale.
- (13) Odredbe ovog člana odnose se i na sve druge objekte i postrojenja na ribolovnoj vodi, koji su izgrađeni u skladu s odredbama Zakona o vodama a koji sprječavaju slobodan prolaz riba.

#### **Član 56. (Radovi na ribolovnoj vodi)**

- (1) U ribolovnoj vodi i priobalnom pojasu ribolovne vode ne smiju se izvoditi građevinski ili bilo koji drugi radovi.
- (2) Iznimno od stava (1) ovog člana izgradnja novih ili rekonstrukcija postojećih objekata u vodoprivredi, građevinarstvu, šumarstvu i rudarstvu može se vršiti samo na osnovu odgovarajuće dozvole i saglasnosti u skladu s odredbama Zakona o vodama i propisa donesenih na osnovu njega.
- (3) Obavljanjem radova u skladu s odredbama stava (2) ovog člana ne smije se uznemiravati i činiti šteta ribljem fondu, te sprječavati slobodna migracija riba.
- (4) U skladu s odredbama stava (2) ovog člana, izgradnja mosta na ribolovnoj vodi mora obezbijediti normalan protok vode i slobodnu migraciju riba.
- (5) Ribolovna voda i njeno korito ne smije se koristiti kao saobraćajnica za mehanizaciju ili plovni put za predmete privrednih djelatnosti iz stava (2) ovog člana.
- (6) Direktno ili indirektno mućenje ribolovne vode nastalo izvođenjem radova u skladu s odredbama st. (2) i (4) ovog člana, ne smije trajati duže od 48 sati u vremenskom roku od deset dana.
- (7) U vrijeme lovostaja zabranjeno je uzrokovati bilo kakvo mućenje ribolovnih voda.

- (8) Pravno, fizičko i svako drugo lice, koje svojim aktivnostima izazove ili pričini štetu ribljem fondu u skladu s odredbama ovog člana dužno je korisniku ribolovnog prava nadoknaditi štetu.
- (9) Šteta pričinjena ribljem fondu u skladu s odredbama stava (8) ovog člana nadoknađuje se u skladu s odredbama člana 54. st. (3), (4), (5), (6), (7) i (8) ovog Zakona.
- (10) Pravno, fizičko i svako drugo lice, koje izvodi radove u ribolovnoj vodi i priobalnom pojasu ribolovne vode u skladu s odredbama Zakona o vodama, obavezno su, prije provođenja istih upoznati korisnika ribolovnog prava, najkasnije 30 dana prije početka radova.
- (11) Odredbe ovoga člana odnose se i na radove na ribolovnoj vodi svih drugih privrednih djelatnosti.

#### **Član 57.**

##### **(Organizovani prijevoz putnika plovilima na ribolovnoj vodi)**

- (1) Fizičko, pravno i svako drugo lice koje obavlja djelatnost organizovanog prijevoza putnika plovilima (brodovi, splavovi, čamci, rafting čamci, kajaci i sl.) dužno je korisniku ribolovnog prava nadoknaditi štetu pričinjenu ribljem fondu i štetu za ometanje u obavljanju sportskog ribolova.
- (2) Šteta pričinjena ribljem fondu u skladu s odredbama stava (1) ovog člana nadoknađuje se u skladu s odredbama člana 54. st. (3), (4), (5), (6), (7) i (8) ovog Zakona.
- (3) Nadoknada štete u skladu s odredbama stava (2) ovog člana izmiruje se korisniku ribolovnog prava trajno svake godine, sve dok lice iz stava (1) ovog člana obavlja svoju djelatnost.

#### **Član 58.**

##### **(Program revitalizacije životnih zajednica)**

- (1) Pravno, fizičko, i svako drugo lice, koje svojim aktivnostima u skladu sa odredbama čl. 54, 55. i 56. ovog Zakona, onemogućiti slobodan i kontinuiran prolaz riba ili izaziva ili pričinjava štetu ribljem fondu u vremenskom roku dužem od dvije godine ili trajno, obavezno je korisniku ribolovnog prava nadoknaditi štetu na osnovu Programa revitalizacije, u skladu sa odredbama člana 54. ovog Zakona.
- (2) Program revitalizacije donosi korisnik ribolovnog prava, najkasnije u vremenskom roku od jedne godine od dana donošenja ovog Zakona.
- (3) Saglasnost na Program revitalizacije daje Federalno ministarstvo, najkasnije u roku od 30 dana od dana podnošenja zahtjeva.
- (4) Saglasnost na Program revitalizacije daje se na vremenski period od deset godina od dana izdavanja saglasnosti.
- (5) Korisnik ribolovnog prava obavezan je uraditi Reviziju programa revitalizacije, najkasnije do isteka roka od pet godina od dana izdavanja saglasnosti na Program revitalizacije.
- (6) Saglasnost na reviziju programa revitalizacije, daje Federalno ministarstvo, najkasnije u roku od 30 dana od dana podnošenja zahtjeva.
- (7) Program revitalizacije i Reviziju programa revitalizacije izrađuje ovlašteno lice.
- (8) Troškove izrade Programa revitalizacije i revizije programa revitalizacije snosi lice iz stava (1) ovog člana.

- (9) Troškove nabavke ribe, organizacije i realizacije poribljavanja ribolovnih voda snosi fizičko ili pravno lice koje svojom aktivnošću izaziva ili nanosi štetu ribljem fondu u skladu sa odredbama člana 53. ovog Zakona.
- (10) Po prestanku uslova koji su doveli do donošenja Programa revitalizacije u skladu sa stavom (1) ovog člana, isti će biti stavljen van snage rješenjem o prestanku važenja kojeg donosi Federalni ministar.

## ***Poglavlje V. Pomor ribe***

### **Član 59. (Pomor ribe)**

- (1) Pomor ribe može nastati kao posljedica prirodne, okolišne ili elementarne nesreće ili neke aktivnosti koja nije u skladu s odredbama ovog Zakona i propisa donesenih na osnovu njega, te drugih Zakona.
- (2) Korisnik ribolovnog prava obavezan je federalnom i kantonalnom poljoprivrednom inspektoratu, kao i svim drugim nadležnim službama, prijaviti svaki pomor ribe u ribolovnom području/zoni za koje je dobio ribolovno pravo.
- (3) Prijava iz stava (2) ovog člana odnosi se i na svaku promjenu ponašanja riba, promjenu fizičkih, hemijskih i bioloških osobina ribolovne vode, onečišćenje vode ili vodenog okoliša ili na saznanje o potencijalnom onečišćenju.
- (4) Uslovi i postupak prijave pomora ribe, aktivnosti koje se moraju provesti u slučaju pomora ribe i način uzimanja i čuvanja uzoraka vode, sedimenta i uginulih riba provode se u skladu sa ovim Zakonom i propisima donesenih na osnovu njega i odredbama drugih zakona.

## **DIO ŠESTI - VOĐENJE EVIDENCIJE U RIBARSTVU**

### **Član 60. (Vođenje evidencije u slatkovodnom ribarstvu)**

- (1) Fizičko, pravno i svako drugo lice koje je korisnik nekog od prava dobijenih na osnovu odredbi ovog Zakona i propisa donesenih na osnovu njega, obavezno je voditi evidenciju o ulovu ili proizvodnji ribe.
- (2) Lice iz stava (1) ovog člana obavezno je nadležnom ministarstvu dostaviti godišnji izvještaj o ulovu ili proizvodnji ribe u propisanom roku.
- (3) Federalni ministar propisuje oblik i sadržaj Registra o izdatim rješenjima, uvjerenjima, dozvolama, ovlaštenjima, odobrenjima i saglasnostima, način vođenja registra, oblik i sadržaj obrasca o vođenju evidencije u privrednom, sportskom, privredno-sportskom ribolovu i akvakulturi, te druga pitanja vezana za vođenje evidencije u ribarstvu.

## **DIO SEDMI – UPRAVNI NADZOR**

### **Poglavlje 1 – Vršenje upravnog nadzora**

#### **Član 61. (Vršenje upravnog nadzora)**

- (1) Federalno ministarstvo vrši upravni nadzor nad provođenjem ovog Zakona i propisa donesenih na osnovu ovog Zakona koji su stavljeni u nadležnost Federacije kao i upravni nadzor nad institucijama, federalnim i kantonalnim organizacijama, pravnim licima, ovlaštenim licima, u obavljanju poslova određenih ovim Zakonom, a koji predstavljaju vršenje javnih ovlaštenja.
- (2) U vršenju nadzora nad izvršavanjem poslova u vršenju javnih ovlaštenja iz stava (1) ovog člana, Federalno ministarstvo ostvaruje neposredan uvid i kontrolu u postupanju, vrši pregled akata i dokumentacije koje donose institucije, upravne organizacije, ovlaštena lica i ovlaštena pravna lica u vršenju javnih ovlaštenja, daje instrukcije i smjernice za izvršavanje poslova i traži podatke i obavještenja o izvršavanju poslova u vršenju javnih ovlaštenja.
- (3) Federalno ministarstvo vrši i nadzor nad kantonalnim ministarstvima u dijelu izvršavanja federalne politike kao i provođenja mjera koje su od značaja za cijelu Federaciju.
- (4) Upravni nadzor nad kantonalnim ministarstvima, institucijama i pravnim licima koja vrše javna ovlaštenja vrši se u žalbenom postupku i kroz ovlaštenja drugostepenog organa i po službenoj dužnosti.
- (5) Kantonalna ministarstva vrše upravni nadzor nad provođenjem ovog Zakona i propisa donesenih na osnovu ovog Zakona, koji su stavljeni u nadležnost kantona. Protiv rješenja kantonalnog ministarstva može se izjaviti žalba Federalnom ministarstvu u roku od 15 dana od dana prijema rješenja.

### **Poglavlje 2 - Inspekcijski nadzor**

#### **Član 62. (Federalna poljoprivredna inspekcija)**

- (1) U provođenju inspekcijskog nadzora iz oblasti slatkovodnog ribarstva federalni poljoprivredni inspektor je ovlašten i obavezan provoditi kontrolu:
  - a) provedbe akta kojim je određeno ribolovno područje/zona;
  - b) vođenja katastra ribolovnog područja;
  - c) stručne osposobljenosti lica koja obavljaju poslove u oblasti slatkovodnog ribarstva;
  - d) izrade i implementacije ribarskih osnova, te njihovih revizija;
  - e) izrade i implementacije Programa revitalizacije, te revizije Programa revitalizacije;
  - f) poslovnih knjiga, dokumenata i evidencije pravnih lica koje se odnose na sprovođenje odredaba ovog Zakona i propisa donesenih na osnovu njega;
  - g) rada Saveza u poslovima iz člana 8. ovog Zakona;
  - h) provođenja odredaba ovog Zakona u posebnim vidovima ribolova;
  - i) provođenja odredaba ovog Zakona u sportskom ribolovu;
  - j) provođenja odredaba ovog Zakona u akvakulturi;

- k) obaveza subjekata prema realizaciji godišnjih i privremenih programa upravljanja, zaštite i unapređenja ribolovnih područja;
  - l) obaveza subjekata prema realizaciji posebnih programa upravljanja, zaštite i unapređenja ribolovnih područja, korištenje sredstava ostvarenih po osnovu kontinuirane štete u zaštiti i očuvanju ribolovnih voda konkretne ribolovne zone;
  - m) subjekata i izdatih dozvola, rješenja i saglasnosti koji su doneseni na osnovu odredaba ovog Zakona;
  - n) načina raspodjele i utroška sredstava od naknade za obavljanje privrednog ribolova i za korištenje ribolovnog područja/zone (ribolovnog prava).
- (2) Pored posebnih ovlasti, federalni poljoprivredni inspektor, cijeneći u postupku inspekcijskog nadzora sa ciljem adekvatnog utvrđivanja činjenica, može nadzirati i postupati po osnovama sadržanim u članu 63. ovog Zakona koje su direktno povjerene kantonalnoj poljoprivrednoj inspekciji.
- (3) Ukoliko nađe da je povrijeđen ovaj Zakon ili drugi propis donesen na osnovu njega, federalni poljoprivredni inspektor je ovlašten:
- a) rješenjem narediti otklanjanje utvrđenih nedostataka, odnosno nepravilnosti u određenom roku subjektima na koje se ovaj Zakon odnosi;
  - b) rješenjem izreći mjeru privremene obustave aktivnosti, djelatnosti ili povjerenih poslova u skladu sa ovlastima datim ovim Zakonom i propisima donesenim na osnovu njega i posebnim zakonom koji reguliše prekršaje;
  - c) izdati prekršajni nalog odnosno podnijeti nadležnom sudu prijavu za pokretanje prekršajnog postupka;
  - d) postupiti u skladu sa Zakonom o prekršajima, a po osnovama ovlasti i datih ovim Zakonom i propisima donesenim na osnovu njega;
  - e) preduzeti i druge mjere, odnosno izvršiti druge radnje za koje je ovim i posebnim propisima ovlašten;
  - f) u slučaju da upravitelj ne provodi obaveze predviđene posebnim programom o korištenju sredstava ostvarenih po osnovu kontinuirane štete u zaštiti i očuvanju ribolovnih voda odobrenim od Federalnog ministarstva, naložiti trenutnu obustavu realizacije i korištenja sredstava sa za te potrebe namijenjenog računa do konačnog rješenja.
- (4) U slučaju utvrđenog nenamjenskog korištenja sredstava po istim osnovama, federalni inspektor je ovlašten preduzeti i mjere predviđene posebnim propisima.

### **Član 63.**

#### **(Kantonalna poljoprivredna inspekcija)**

- (1) Kantonalna poljoprivredna inspekcija obavlja sve poslove inspekcijskog nadzora osim poslova za koje je ovim Zakonom određeno da ih direktno obavlja federalna poljoprivredna inspekcija, a naročito da:
- a) kontroliše donošenje i sprovođenje godišnjeg plana, odnosno pojedinih mjera utvrđenih tim planom;
  - b) nadzire izdavanje ribolovnih dozvola od strane izdavaoca dozvole do krajnjeg korisnika;
  - c) vodi službene podatke za područje kantona o povredama odredbi ovog Zakona i propisa donesenih na osnovu njega;
  - d) aktivnosti koje provodi fizičko ili pravno lice koje obavlja poslove u oblasti šumarstva i/ili koje je vlasnik objekata za smještaj i preradu drveta i šumske mehanizacije, a koje imaju utjecaj na riblji fond i njihovo stanište;

- e) izvještava nadležne organe o nepravilnostima i predlaže provođenje određenih mjera, ako sam nije ovlašten za preduzimanje odgovarajućih mjera;
  - f) uzima potrebne službene uzorke radi analize ribe drugih vodenih organizama u nadležnoj laboratoriji. Troškove analize službenih uzoraka nastalih u postupku snosi stranka;
  - g) izdaje prekršajne naloge odnosno podnosi prijavu za pokretanje prekršajnog postupka radi povrede odredbi ovog Zakona i propisa donesenih na osnovu njega.
  - h) kontroliše provođenja odredbi ovog Zakona o provođenju mjera poribljavanja i premještanja riba;
  - i) kontroliše riblje staze, odnosno nadzor nad slobodnim i kontinuiranim prolaskom riba;
- (2) Kada utvrdi da je povrijeđen ovaj Zakon ili drugi propis donesen na osnovu njega, kantonalni poljoprivredni inspektor ima pravo i obavezu da:
- a) zabrani zatvaranje ili crpljenje vode iz dijela ribolovnog područja, ako se time prouzrokuje opasnost za opstanak ribe;
  - b) zabrani naglo ispuštanje vode iz prirodnih i vještačkih jezera i drugih akumulacija, ako se time prouzrokuje opasnost za opstanak ribe;
  - c) zabrani ispuštanje štetnih i opasnih materija u ribolovnu vodu;
  - d) zabrani obavljanje akvakulture i promet ribe, riblje mlađi i oplodene ikre, ako se vrši suprotno odredbama ovog Zakona;
  - e) zabrani lov ribe nedozvoljenim sredstvima;
  - f) zabrani lov ribe, ako se isti vrši suprotno odredbama zabrane sadržanim u članu 53. ovog Zakona;
  - g) naredi spašavanje ribe i riblje mlađi sa zemljišta koje je poplavljeno;
  - h) zabrani kretanje licima bez dozvole sa sredstvima i alatima za ribolov na putevima pored i unutar ribolovnog područja, ribnjaka ili drugih ribolovnih voda;
  - i) zabrani držanje sredstava i alata za ribolov u objektima i na objektima koji se nalaze na ribolovnoj vodi ili na drugim objektima na ribolovnom području, licu koje nije ovlašteno da obavlja ribolov;
  - j) zabrani obavljanje aktivnosti, mehaničke/fizičke zahvate na zemljištu u blizini vodotoka, ribolovnih voda, koje mogu rezultirati zamućenjem ribolovnih voda i vodotoka;
  - k) privremeno, do odluke nadležnog organa, oduzme od korisnika ili fizičkog lica sredstva i alat za ribolov, kao i ulov i druge predmete upotrijebljene za izvršenje radnje kažnjive po ovom Zakonu i predmete nastale izvršenjem takve radnje i bez odlaganja preda nadležnom organu; .
- (3) Kada nadležni inspektor prilikom vršenja inspeksijskog nadzora utvrdi da propis nije primijenjen ili je nepravilno primijenjen, donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.
- (4) Ako je zakonom ili drugim propisom predviđeno da se za utvrđene nepravilnosti primjenjuju određene upravne mjere, inspektor će u rješenju iz stava (3) ovog člana izreći i tu mjeru.
- (5) Protiv rješenja kantonalnog poljoprivrednog inspektora može se izjaviti žalba direktoru Federalne uprave za inspeksijske poslove u roku od 8 dana od dana prijema rješenja.
- (6) Protiv rješenja federalnog poljoprivrednog inspektora može se izjaviti žalba Federalnom ministarstvu u roku od 8 dana od dana prijema rješenja. Kad je za

- izvršavanje poslova inspekcijskog nadzora potrebno uzeti uzorke i izvršiti analizu nadležni poljoprivredni inspektor će naložiti uzimanje uzorka.
- (7) Troškove analize službenih uzoraka nastalih u postupku snosi stranka.

## **DIO OSMI - KAZNE NE ODREDBE**

### **Član 64. (Kaznene odredbe)**

- (1) Novčanom kaznom od 20.000 KM do 50.000 KM kaznit će se za prekršaj pravno lice ako:
- a) svojim aktivnostima u ribolovnoj vodi ili u području ribolovne vode izazove ili pričini štetu ribljem fondu iz člana 54. stav (1);
  - b) ne nadoknadi štetu pričinjenu ribljem fondu u propisanom roku iz člana 54. stav (1), člana 55. stav (8), člana 56. stav (8) i člana 57. stav (1);
  - c) pregradi vodotok u ribolovnoj vodi i onemogućiti slobodan prolaz - migraciju riba iz člana 55. stava (1) i (3);
  - d) ne izgradi riblju stazu u propisanom roku iz člana 55. st. (4) i (5);
  - e) po prestanku rada ne odstrani branu sa ribolovne vode, a ribolovnu vodu dovede u stanje od prije izgradnje brane u propisanom roku iz člana 55. stava (7);
  - f) izvodi građevinske ili bilo koje druge radove u ribolovnoj vodi i priobalnom pojasu ribolovne vode iz člana 56. stav (1);
  - g) u ribolovnoj vodi i priobalnom pojasu ribolovne vode, izgradnjom novih ili rekonstrukcijom postojećih objekata u vodoprivredi, građevinarstvu, šumarstvu, rudarstvu i svim drugim privrednim djelatnostima, uznemirava i čini štetu ribljem fondu, te sprječava slobodnu migraciju riba iz člana 56. st. (2), (3) i (11);
  - h) ne obezbijedi normalan protok vode i slobodnu migraciju riba iz člana 56. stav (4);
  - i) ribolovnu vodu i njeno korito koristi kao saobraćajnicu za mehanizaciju ili plovni put za predmete privrednih djelatnosti iz člana 56. stav (5);
  - j) direktno ili indirektno muti ribolovnu vodu duže od 48 sati u vremenskom roku od deset dana iz člana 56. stav (6);
  - k) muti vodu u vrijeme lovostaja iz člana 56. stav (7);
  - l) ne posjeduje i ne održava u funkciji uređaje koji onemogućavaju ulazak ribe iz ribolovnih voda u dovodne, odvodne, turbinske i druge kanale iz člana 55. stav (12);
  - m) u posebnom staništu, posebnim ribolovnim stazama ili ribolovnim vodama sa zabranom ribolova vadi šljunak, pijesak, kamen, panjeve i bilo koje druge materijale, koristi čamac ili druga plovila, zahvata ili crpi vodu, odlaže i deponuje bilo kakav materijal, pere vozila, kupa stoku i kućne ljubimce, te vrši druge radnje i zahvate i provodi aktivnosti koje plaše ili ometaju ribe iz člana 50. stav (8), člana 51. stav (7) i člana 52. stav (5);
  - n) blagovremeno i u potpunosti ne ispunjava obaveze propisane Programom revitalizacije i Revizije programa revitalizacije iz člana 58. stav (1).



- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 2.000 KM do 5.000 KM.
- (3) Za prekršaj iz stava (1) ovog člana, pored novčane kazne izriče se i zaštitna mjera oduzimanja predmeta koji su upotrijebljeni ili bili namijenjeni izvršenju prekršaja ili su nastali njegovim izvršenjem i zaštitna mjera oduzimanja imovinske koristi pribavljene izvršenjem prekršaja.
- (4) Sredstva dobivena od novčanih kazni za prekršaje i izrečenih zaštitnih mjera po odredbama ovoga Zakona su prihod Budžeta Federacije Bosne i Hercegovine.

**Član 65.**  
**(Kaznene odredbe)**

- (1) Novčanom kaznom od 5.000 KM do 10.000 KM kaznit će se za prekršaj pravno lice, fizičko lice-obrtnik, ovlašteno lice i udruženje ako:
  - a) ne donese Program revitalizacije životnih zajednica u propisanom roku iz člana 58. stav (1) i (2);
  - b) ne uradi reviziju programa revitalizacije životnih zajednica u propisanom roku iz člana 58. stav (5);
  - c) ne izmiri troškove izrade Revizije ribolovne osnove prilikom izazivanja ili činjenja štete ribljem fondu iz člana 54. stav (5);
  - d) ne izmiri troškove izrade Programa revitalizacije i Revizije programa revitalizacije iz člana 58;
  - e) korisniku ribolovnog prava ne omogući slobodan pristup ribljoj stazi iz člana 55. stav (10);
  - f) prije početka izvođenja radova u ribolovnoj vodi i priobalnom pojasu ribolovne vode ne upozna korisnika ribolovnog prava sa istim u propisanom roku iz člana 56. stav (10);
  - g) privredni ribolov obavlja bez dozvole za privredni ribolov iz člana 18. stav (1);
  - h) dozvolu za privredni ribolov ustupi ili prenese na drugo lice iz člana 18. stav (10);
  - i) obavlja privredni ribolov nakon oduzimanja ili prestanka važenja dozvole za privredni ribolov iz člana 21. stav (1);
  - j) ne obezbijedi stručno vođenje poslovima privrednog ribolova iz člana 17. stav (2);
  - k) privredni ribolov obavlja u vrijeme privremenog ograničenja ili zabrane obavljanja privrednog ribolova iz člana 20. stav (1);
  - l) privredni ribolov obavlja u posebnim staništima i/ili ribolovnim vodama sa zabranom ribolova iz člana 50. stav (5), člana 53. stav (1) tačka b);
  - m) u privrednom ribolovu lovi i zadržava ribu nakon ulova, odnosno sortiranja na plovilu ili kopnu, prevozi, skladišti, prerađuje, izlaže, prodaje, stavlja u promet ribu za vrijeme lovostaja iz člana 53. stav (1) tačka c);
  - n) u privrednom ribolovu lovi i zadržava ribu nakon ulova, odnosno sortiranja na plovilu ili kopnu, prevozi, skladišti, prerađuje, izlaže, prodaje, stavlja u promet ribu ispod minimalne i maksimalne propisane veličine iz člana 53. stav (1) tačka d);
  - o) u privrednom ribolovu lovi ribu podvodnom puškom, ostima, harpunima i drugim nedopuštenim alatima i priborom iz člana 53. stav (1) tačka k);
  - p) u privrednom ribolovu lovi ribu eksplozivnim ili hemijskim sredstvima koja ih ubijaju, truju ili omamljuju iz člana 53. stav (1) tačka p);

- r) u privrednom ribolovu lovi ribu strujom visokog napona ili agregatima za elektroribolov iz člana 53. stav (1) tačka m);
- s) u privrednom ribolovu koristi ehosonar i druge elektronske uređaje iz člana 53. stav (1) tačka n);
- t) u privrednom ribolovu lovi ribu u ribolovnim vodama uz upotrebu strane riblje vrste (žive ili mrtve) kao mamca iz člana 53. stav (1) tačka i);
- u) ribolovno pravo ustupi ili prenese na drugo lice iz člana 24. stav (14);
- v) ne obezbijedi stručno vođenje poslova upravljanja ribolovnim područjem/zonom koje mu je dodijeljeno na korištenje u propisanom roku iz člana 25. stav (3);
- z) ne donese i Federalnom ministarstvu ne dostavi na usvajanje Ribolovnu osnovu u propisanom roku iz člana 28. stav (1);
- aa) ne uradi i Federalnom ministarstvu ne dostavi na usvajanje Reviziju ribolovne osnove u propisanom roku iz člana 28. stav (4);
- bb) ne uradi i Federalnom ministarstvu ne dostavi na usvajanje Privremeni program u propisanom roku iz člana 30. stav (1);
- cc) donosi interne akte koji su u suprotnosti sa odredbama ovog Zakona i propisa donijetim na osnovu njega iz člana 27. st. (1) i (2);
- dd) ne organizuje ribočuvarsku službu u propisanom roku iz člana 37. stav (1);
- ee) za ribočuvara imenuje lice u suprotnosti s odredbama ovog Zakona iz člana 37. stav (4);
- ff) ne vrši poribljavanje ribolovnih voda ili poribljavanje ne obavlja u skladu sa ribolovnom osnovom i Godišnjim programom iz člana 48. st. (1) i (3);
- gg) vrši poribljavanje neautohtonim-alohtonim vrstama riba ili ribama neutvrđenih genetskih karakteristika iz člana 48. stav (4);
- hh) ribolovne vode poribljava ribom koja potječe iz ribogojilišta koje ne posjeduje odobrenje za uzgoj autohtonih vrsta riba iz člana 48. stav (5);
- ii) ne uvede zabranu ribolova u poribljenom području u propisanom roku iz člana 48. stav (6);
- jj) omogući lov ribe u posebnim staništima i ribolovnim vodama sa zabranom ribolova iz člana 53. stav (1) tačka b);
- kk) u sportskom ribolovu omogući lov i zadržavanje ribe neposredno nakon ostvarivanja ulova za vrijeme lovostaja iz člana 53. stav (1) tačka c);
- ll) u sportskom ribolovu omogući lov i zadržavanje ribe neposredno nakon ostvarivanja ulova ispod minimalne i maksimalne propisane veličine iz člana 53. stav (1) tačka d);
- mm) omogući da se riba ulovljena u sportskom ribolovu stavlja u promet iz člana 53. stav (1) tačka e);
- nn) u posebnim staništima, posebnim ribolovnim stazama i ribolovnim vodama sa zabranom ribolova omogući vađenje šljunka, pijeska, kamena, panjeva i bilo kojeg drugog materijala, korištenje čamca ili drugog plovila, zahvatanje ili crpljenje vode, odlaganje i deponovanje bilo kakvog materijala, pranje vozila, kupanje i kupanje stoke i kućnih ljubimaca, te vršenje drugih radnji i zahvata i provođenje aktivnosti koje plaše ili ometaju ribu iz člana 50. stav (8), člana 51. stav (7) i člana 52. stav (5);
- oo) omogući lov ribe u ribolovnim vodama uz upotrebu strane riblje vrste (žive ili mrtve) kao mamca iz člana 53. stav (1) tačka i);

- pp) omogući lov ribe podvodnom puškom, ostima, harpunima i drugim nedopuštenim alatima i priborom iz člana 53. stav (1) tačka k);
  - rr) omogući lov ribe mrežama, vršama, parangalima ili drugim profesionalnim ribarskim alatima i priborom iz člana 53. stav (1) tačka l);
  - ss) koristi agregat za elektroribolov ili omogući njihovo korištenje u sportskom ribolovu iz člana 53. stav (1) tačka m);
  - tt) koristi ehosonar i druge elektronske uređaje ili omogući njihovo korištenje u sportskom ribolovu iz člana 53. stav (1) tačka n);
  - uu) omogući lov ribe noću iz člana 53. stav (1) tačka o);
  - vv) ne posjeduje dozvolu za privredno-sportski ribolov iz člana 38. stav (2);
  - zz) dozvolu za privredno-sportski ribolov ustupi ili prenese na drugo lice iz člana 39. stav (6);
  - aaa) obavlja privredno-sportski ribolov nakon oduzimanja ili prestanka važenja dozvole za privredno-sportski ribolov iz člana 40. stav (1) tačka a) i stav (5);
  - bbb) u ribnjaku drži alohtone vrsta riba i drugih vodenih organizama bez odobrenja Federalnog ministarstva iz člana 39. st. (8) i (12);
  - ccc) provodi ribolov radi obavljanja naučnih i stručnih poslova u oblasti slatkovodnog ribarstva bez odgovarajućeg ovlaštenja iz člana 53. stav (1) tačka z);
  - ddd) bez odgovarajuće dozvole obavlja ribolov u naučno-istraživačke svrhe, selektivni ili sanacioni ribolov iz člana 41. stav (2) i člana 53. stav (1) tačka aa);
  - eee) dozvolu za ribolov u naučno-istraživačke svrhe, selektivni ili sanacioni ribolov ustupi ili prenese na drugo lice iz člana 41. stav (6);
  - fff) akvakulturu obavlja bez dozvole za akvakulturu iz člana 42. stav (2);
  - ggg) dozvolu za akvakulturu ustupi ili prenese na drugo lice iz člana 43. stav (6);
  - hhh) obavlja djelatnost akvakulture nakon oduzimanja ili prestanka važenja dozvole za akvakulturu iz člana 45. stav (1) i člana 46.;
  - iii) ne obezbijedi stručno vođenje poslova akvakulture u propisanom roku iz člana 43. stav (6);
  - jjj) uvozi ili u ribogojilištu drži i uzgaja alohtone vrste riba i drugih vodenih organizama bez odobrenja za uvoz i uzgoj alohtonih vrsta riba iz člana 44. stav (3);
  - kkk) odobrenje za uzgoj autohtonih vrsta riba ustupi ili prenese na drugo lice iz člana 44. stav (8);
  - lll) odobrenje za uvoz i uzgoj alohtonih vrsta riba ustupi ili prenese na drugo lice iz člana 44. stav (8);
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 500 KM do 1.000 KM.

### **Član 66. (Kaznene odredbe)**

- (1) Novčanom kaznom od 500 KM do 3.000 KM kaznit će se za prekršaj pravno lice, fizičko lice-obrtnik, ovlašteno lice i udruženje ako:
- a) privredni ribolov obavlja na onom dijelu ribolovnog područja/zone koji nije upisan u dozvolu iz člana 22. stav (1);

- b) privredni ribolov obavlja ribolovnim alatima i opremom koji nisu upisani u dozvolu iz člana 22. stav (1);
- c) obavlja ribolov u količini većoj od upisane u dozvolu iz člana 22. stav (1);
- d) privredni ribolov obavlja ribolovnim alatima i opremom koji nisu na propisan način označeni iz člana 22. stav (1);
- e) u privrednom ribolovu lovi ribu u depresijama, barama, poplavljenim površinama i drugim vodenim površinama koje nastaju povlačenjem vode iz člana 53. stav (1) tačka h);
- f) vidno ne označi granice ribolovnog područja/zone za koju je dobio ribolovno pravo u propisanom roku iz člana 32. stav (1);
- g) vidno ne označi granice posebnog staništa, posebne ribolovne staze i ribolovne vode sa zabranom ribolova u propisanom roku iz člana 50. stav (4), člana 51. stav (4) i člana 52. stav (3);
- h) u privrednom ribolovu lovi ribu u virovima, barama, rukavcima, i dr. koji su zbog niskog vodostaja odvojeni od glavnog vodotoka ili kroz njih ne teče vodotok iz člana 53. stav (1) tačka s);
- i) u privrednom ribolovu lovi ribu direktno rukom, povlačenjem i kaćanjem udicom s vanjske strane tijela ribe iz člana 53. stav (1) tačka t);
- j) u privrednom ribolovu lovi ribu unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta iz člana 53. stav (1) tačka u);
- k) u privrednom ribolovu lovi ribe 100 metara uzvodno i nizvodno od ograde objekata akvakulture iz člana 53. stav (1) tačka v);
- l) za vrijeme obavljanja ribolova ne posjeduje dozvolu kod sebe ili na plovilu iz člana 22. stav (2);
- m) sprječava obavljanje ribočuvarskog nadzora ili ribočuvaru ne pruža sve potrebne podatke i obavijesti u vezi sa obavljanjem privrednog ribolova iz člana 22. stav (4);
- n) ne vodi evidenciju o ribolovu i ulovu ribe u privrednom ribolovu iz člana 22. stav (5);
- o) Kantonalnom ministarstvu ne dostavi godišnji izvještaj o ulovu ribe u privrednom ribolovu iz člana 22. stav (5);
- p) Kantonalnom ministarstvu ne dostavi podatke neophodne za vođenje katastra ribolovnih voda u propisanom roku iz člana 16. stav (6);
- r) Kantonalnom ministarstvu ne dostavi Godišnji program u propisanom roku iz člana 29. stav (2);
- s) Kantonalnom ministarstvu ne dostavi Izvještaj o realizaciji Godišnjeg programa za prethodnu godinu u propisanom roku iz člana 29. stav (5);
- t) ne uskladi Godišnji program sa godišnjim programom susjednog ribolovnog područja ili zone iz člana 29. stav (6);
- u) ne vodi evidenciju o ribolovu i ulovu ribe u sportskom ribolovu iz člana 33. stav (9);
- v) Kantonalnom ministarstvu ne dostavi godišnji izvještaj o ulovu ribe u sportskom ribolovu u propisanom roku iz člana 33. stav (9);
- z) izdaje ribolovne dozvole ribolovcu koje nisu u skladu sa odredbama provedbenog propisa o sportskom ribolovu iz člana 11.;
- aa) izdaje ribolovnu dozvolu za tekuću godinu ribolovcu koji nije dostavio godišnji izvještaj za prethodnu godinu iz člana 35. stav (8);
- bb) u ribnjaku drži one vrste i one količine ribe koje nisu upisane u dozvolu za privredno-sportski ribolov iz člana 39. stav (7);

- cc) ne vodi evidenciju o privredno-sportskom ribolovu iz člana 39. stav (9);
  - dd) Federalnom ministarstvu ne dostavi godišnji izvještaj o privredno-sportskom ribolovu u propisanom roku iz člana 39. stav (9);
  - ee) kod sebe ne posjeduju dozvolu za ribolov u naučno-istraživačke svrhe, selektivni ili sanacioni ribolov iz člana 41. stav (7);
  - ff) u ribogojilištu drži i uzgaja vrste i količine ribe koje nisu upisane u dozvolu za akvakulturu iz člana 43. stav (8);
  - gg) ne voditi evidenciju o akvakulturi iz člana 43. stav (9);
  - hh) Federalnom ministarstvu ne dostavi godišnji izvještaj o akvakulturi u propisanom roku iz člana 43. stav (9);
  - ii) u ribogojilištu drži vrste i količine ribe koji nisu upisane u odobrenje iz člana 44. stav (9);
  - jj) u slučaju trajnog narušavanja fizičkih, hemijskih ili bioloških osobina ribolovnih voda ne preduzme mjere premještanja ribljeg fonda u druge ribolovne vode iz člana 49. stav (1);
  - kk) u slučaju elementarnih nepogoda (poplava, suša, i sl.) ne preduzme mjere čuvanja, spašavanja i premještanja ribe iz člana 49. stav (2);
  - ll) posebno stanište, posebnu ribolovnu stazu i ribolovnu vodu sa zabranom ribolova organizuje bez saglasnosti Federalnog ministarstva iz člana 50. stav (3), člana 51. stav (3) i člana 52. stav (2);
  - mm) omogući obavljanje sportskog ribolova bez odgovarajuće ribolovne dozvole iz člana 23. stav (2);
  - nn) omogući lov ribe u depresijama, barama, poplavljenim površinama i drugim vodenim površinama koje nastaju povlačenjem vode iz člana 53. stav (1) tačka h);
  - oo) omogući lov ribe s više ribolovnih alata ili opreme nego što je dozvoljeno odredbama ovog Zakona i propisima donesenim na osnovu njega iz člana 53. stav (1) tačka j);
  - pp) na bilo koji način sprječava povratak riba s poplavljenog područja u vodotoke, omogući lov ribe sredstvima koja sprječavaju povratak riba s poplavljenog područja te sprječava bilo koja druga migratorna kretanja riba iz člana 53. stav (1) tačka r);
  - rr) omogući lov ribe u virovima, barama, rukavcima i dr. koji su zbog niskog vodostaja odvojeni od glavnog vodotoka ili kroz njih ne teče vodotok iz člana 53. stav (1) tačka s);
  - ss) omogući lov ribe direktno rukom, povlačenjem i kaćanjem udicom s vanjske strane tijela ribe iz člana 53. stav (1) tačka t);
  - tt) omogući lov ribe unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta iz člana 53. stav (1) tačka u);
  - uu) omogući lov ribe 100 metara uzvodno i nizvodno od ograde objekata akvakulture iz člana 53. stav (1) tačka v);
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 100 KM do 300 KM.

#### **Član 67. (Kaznene odredbe)**

Novčanom kaznom od 3.000 KM do 5.000 KM kaznit će se za prekršaj fizičko lice ako:

- a) lovi ribu podvodnom puškom, ostima, harpunima i drugim nedopuštenim alatima i priborom iz člana 53. stav (1) tačka k);
- b) lovi ribu mrežama, vršama, parangalima ili drugim profesionalnim ribarskim alatima i priborom iz člana 53. stav (1) tačka l);
- c) lovi ribu strujom visokog napona ili agregatima za elektroribolov iz člana 53. stav (1) tačka m);
- d) u ribolovu koristi ehosonar i druge elektronske uređaje iz člana 53. stav (1) tačka n);
- e) lovi ribu noću iz člana 53. stav (1) tačka o);
- f) lovi ribu eksplozivnim ili hemijskim sredstvima koja ih ubijaju, truju ili omamljuju iz člana 53. stav (1) tačka p);
- g) lovi ribu u ribolovnim vodama uz upotrebu strane riblje vrste (žive ili mrtve) kao mamca iz člana 53. stav (1) tačka i);
- h) u posebnom staništu, posebnim ribolovnim stazama ili ribolovnim vodama sa zabranom ribolova vadi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se i kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe iz čl. 50. stav (8), 51. stav (7) i 52. stav (5).

#### **Član 68. (Kaznene odredbe)**

Novčanom kaznom od 1.000 KM do 2.000 KM kaznit će se za prekršaj fizičko lice ako:

- a) lovi ribu uz upotrebu nedopuštenih ribolovnih alata, opreme i mamaca iz člana 35. stav (4);
- b) lovi ribu bez ribolovne dozvole ili važeće ribolovne dozvole iz člana 53. stav (1) tačka a);
- c) lovi ribu u posebnim staništima i ribolovnim vodama sa zabranom ribolova iz člana 53. stav (1) tačka b) ;
- d) za vrijeme lovostaja lovi i zadržava ribu neposredno nakon ostvarivanja ulova u sportskom ribolovu iz člana 53. stav (1) tačka c);
- e) ispod minimalne i maksimalne propisane veličine lovi i zadržava ribu neposredno nakon ostvarivanja ulova u sportskom ribolovu iz člana 53. stav (1) tačka d);
- f) ribu ulovljenu u sportskom ribolovu stavlja u promet iz člana 53. stav (1) tačka e);
- g) ometa postavljanje znakova ili skida znakove kojima se označava ribolovno područje/zona, posebno stanište, posebne ribolovne staze i ribolovne vode sa zabranom ribolova iz člana 53. stav (1) tačka cc);
- h) na ribolovnoj vodi ili neposredno uz nju nosi ili posjeduje u vozilu ili plovilu otrovne, nagrizajuće ili omamljujuće materije, eksplozivna sredstva, materije koje u kombinaciji s drugim materijama mogu proizvesti eksploziju, mreže, vrše, parangale podvodne puške, osti, harpune, uređaje za ribolov električnom strujom ili druga nedopuštena sredstva iz člana 53. stav (1) tačka dd).

**Član 69.**  
**(Kaznene odredbe)**

Novčanom kaznom od 200 KM do 1.000 KM kaznit će se za prekršaj fizičko lice ako:

- a) ribočuvaru ne omogući obavljanje ribočuvarskog nadzora iz člana 35. stav (3);
- b) lovi ribu s mosta i objekata koji se nalaze na ili iznad vodene površine i koji nisu udaljeni više od dva metra od obale iz člana 53. stav (1) tačka f);
- c) koristi plovilo za obavljanje sportskog ribolova iz članu 53. stav (1) tačka g);
- d) lovi ribu u depresijama, barama, poplavljenim površinama i drugim vodenim površinama koje nastaju povlačenjem vode iz člana 53. stav (1) tačka h);
- e) ribe zadržane u ulovu ne upiše u ribolovnu dozvolu u propisanom roku iz člana 35. stav (7);
- f) ne vodi evidenciju o ribolovu i ulovu ribe iz člana 35. stav (8);
- g) korisniku ribolovnog prava ne dostavi izvještaj o godišnjem ulovu u propisanom roku iz člana 35. stav (8);
- h) lovi ribu s više ribolovnih alata ili opreme nego što je dozvoljeno odredbama ovog Zakona i propisima donesenim na osnovu njega iz člana 53. stav (1) tačka j);
- i) na bilo koji način sprječava povratak riba s poplavljenog područja u vodotoke, lovi ribu sredstvima koja sprječavaju povratak riba s poplavljenog područja, te sprječava bilo koja druga migratorna kretanja riba iz člana 53. stav (1) tačka r);
- j) lovi ribu u virovima, barama, rukavcima i dr. koji su zbog niskog vodostaja odvojeni od glavnog vodotoka ili kroz njih ne teče vodotok iz člana 53. stav (1) tačka s);
- k) lovi ribu direktno rukom, povlačenjem i kaćanjem udicom s vanjske strane tijela ribe iz člana 53. stav (1) tačka t);
- l) lovi ribu unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta iz člana 53. stav (1) tačka u);
- m) lovi ribe 100 metara uzvodno i nizvodno od ograde objekata akvakulture iz člana 53. stav (1) tačka v);
- n) uz ribolovnu vodu ili u plovilu ostavlja ribolovni alat ili opremu ili ulov bez nadzora i osiguranja vlasnika istoga iz člana 53. stav (1) tačka ee);
- o) pere vozila, kupa stoku i kućne ljubimce u ribolovnoj vodi uz upotrebu štetnih i opasnih sredstava iz člana 53. stav (1) tačka ff).

**Član 70.**  
**(Kaznene odredbe)**

- (1) Za prekršaje iz čl. 64, 65, 66, 67, 68. i 69. ovog Zakona, pored novčane kazne izriče se i zaštitna mjera oduzimanja predmeta koji su upotrijebljeni ili bili namijenjeni izvršenju prekršaja ili su nastali njegovim izvršenjem i zaštitna mjera oduzimanja imovinske koristi pribavljene izvršenjem prekršaja.
- (2) Sredstva dobivena od novčanih kazni za prekršaje i izrečenih zaštitnih mjera iz čl. 64, 65, 66, 67, 68. i 69. ovog Zakona su prihod Budžeta Federacije.

## **DIO DEVETI - PRIJELAZNE I ZAVRŠNE ODREDBE**

### **Član 71. (Rok za usklađivanje)**

Korisnici ribolovnog prava, dozvola za privredni i privredno-sportski ribolov i akvakulturu dužni su u roku od godinu dana od dana stupanja na snagu ovog Zakona uskladiti svoje poslovanje sa odredbama ovog Zakona.

### **Član 72. (Rok za donošenje podzakonskih akata)**

Podzakonski akti za sprovođenje ovog Zakona donijet će se u roku od dvije godine od stupanja na snagu ovog Zakona.

### **Član 73. (Primjena važećih propisa)**

Do donošenja propisa iz člana 72. ovog Zakona primjenjivat će se podzakonski propisi doneseni na osnovu Zakona o slatkovodnom ribarstvu („Službene novine Federacije BiH“, br. 64/04 i 27/10).

### **Član 74. (Prestanak važenja propisa)**

Danom stupanja na snagu ovog Zakona prestaje da važi Zakon o slatkovodnom ribarstvu („Službene novine Federacije BiH“, br. 64/04 i 27/10).

### **Član 75. (Stupanje na snagu)**

Ovaj Zakon stupa na snagu osmog dana od dana objavljivanja u „Službenim novinama Federacije BiH“.



## **O B R A Z L O Ž E N J E**

### **NACRTA ZAKONA O SLATKOVODNOM RIBARSTVU**

#### **I. USTAVNI OSNOV**

Ustavni osnov za donošenje Zakona o slatkovodnom ribarstvu sadržan je u članu III. 1. tačka b), koji je izmijenjen amandmanom VIII, LXXXIX i CVI, i članu IV.A.20.(1) Ustava Federacije Bosne i Hercegovine, prema kojem je u isključivoj ovlasti Federacije BiH utvrđivanje privredne politike, uključujući planiranje i obnovu, te politiku korištenja zemljišta na federalnom nivou, a Parlament Federacije BiH, uz ostale ovlasti predviđene Ustavom, odgovoran za donošenje zakona o obnašanju dužnosti federalne vlasti, te u članu III. 2. tačka c) i h) Ustava Federacije Bosne i Hercegovine, prema kojem federalna vlast i kantoni su mjerodavni za politiku čovjekove okoline i korištenja prirodnih bogatstava.

#### **II. RAZLOZI ZA DONOŠENJE ZAKONA**

Oblast ribarstva u Federaciji BiH definisana je Zakonom o slatkovodnom ribarstvu („Službene novine Federacije BiH“, br. 64/04 i 27/10) i pratećim podzakonskim aktima. Razlozi zbog kojih se odlučilo krenuti u izmjenu javne politike leže u tome što propisi koji regulišu oblast ribarstva ne doprinose u dovoljnoj mjeri efikasnom upravljanju, odnosno, zaštiti i održivom korišćenju ribljeg fonda u ribolovnim vodama, pri čemu održivo korišćenje podrazumijeva iskorištavanje ribljeg fonda na način koji osigurava zaštitu i očuvanje biološke raznolikosti i ekološkog integriteta vodenih ekosistema u Federaciji BiH. Pored toga, postoji određena neusaglašenost Zakona o slatkovodnom ribarstvu i drugih zakona koji dotiču ovu oblast (vode, zemljište, koncesije, okoliš), jer zakoni koji su usvojeni kasnije nisu usaglašavani sa odredbama važećeg Zakona o slatkovodnom ribarstvu, a također postoji izvjesna neusklađenost i sa propisima EU.

Ustavni sud Federacije Bosne i Hercegovine, odlučujući po zahtjevu Načelnika Općine Olovo za zaštitu prava na lokalnu samoupravu u vezi sa Zakonom o slatkovodnom ribarstvu na osnovu člana IV.C.3.10 (3) Ustava Federacije Bosne i Hercegovine u vezi sa Amandmanom XCVI na Ustav Federacije Bosne i Hercegovine 29.11. 2017. godine donio je presudu kojom je utvrđeno da je čl. 5. i 6., članom 10. stav 7., članom 17. i članom 18. stav 6. Zakona o slatkovodnom ribarstvu („Službene novine Federacije BiH“, br. 64/04 i 27/10) povrijeđeno pravo na lokalnu samoupravu Općine Olovo. U skladu s članom IV.C.12.B) Ustava Federacije Bosne i Hercegovine, Ustavni sud Federacije Bosne i Hercegovine odredio je prijelaznu mjeru, kojom je dao mogućnost Parlamentu Federacije Bosne i Hercegovine, da u toku od šest mjeseci od dana objavljivanja presude u „Službenim novinama Federacije BiH“ uskladi Zakon o slatkovodnom ribarstvu sa Zakonom o načelima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09), do kada se gore navedene odredbe mogu primjenjivati.

Tome u prilog dodatno govori i Zaključak Federalnog ministarstva poljoprivrede, vodoprivrede i šumarstva da u Planu rada uvrsti izradu novog zakona, kojim će se provesti Presuda Ustavnog suda Federacije Bosne i Hercegovine i kojim će u skladu sa evropskim standardima urediti ribarstvo, kao privrednu granu i sve vidove ribolova (ovdje treba imati na umu da u vremenu kada je usvajan Zakon o slatkovodnom

ribarstvu 2004. godine nije postojala obaveza usklađivanja domaćeg zakonodavstva sa propisima EU.

Nemogućnost aktuelnog Zakona o ribarstvu da pruži adekvatnu osnovu za efikasno upravljanje ribljim fondom, prvenstveno u cilju zaštite i održivog korišćenja ribljeg fonda, manifestuje se kroz određene nedorečenosti koje se mogu svrstati u četiri osnovne kategorije:

- Zakonski nije dovoljno dobro definisan način utvrđivanja ribarskih područja, nisu definisani kriteriji kod odabira subjekata za davanje na korišćenje ribarskog područja, nisu jasno definisani načini upravljanja ribljim fondom u ribolovnim vodama, te nisu definisani kriteriji i uslovi za izbor osoba koje mogu biti ribočuvari;
- Problemi vezani za praćenje i kontrolu stanja ribljeg fonda u ribolovnim vodama gdje Zakonom propisani programi unapređenja ribarstva trenutno ne sadrži dovoljno obavezujućih elemenata potrebnih za efikasno upravljanje ribolovnim područjima i održivo korišćenje ribljeg fonda u Federaciji BiH;
- Problemi vezani za oblast privrednog ribolova i oblast akvakulture koji nisu Zakonom jasno i precizno definisana. Imajući u vidu da Federacija BiH raspolaže sa značajnim resursima za uzgoj ribe u kontrolisanim uslovima u zakonu bi trebalo detaljnije definisati ovu oblast.
- Odredbe postojećeg zakona nisu predvidjele ovlaštenja za obavljanje naučnih i stručnih poslova iz oblasti slatkovodnog ribarstva.

Tim slijedom kao osnovni ciljevi nove javne politike u oblasti ribarstva definisani su ciljevi:

- a) da se stručnim određivanjem granica ustanove funkcionalna i održiva ribolovna područja i zone;
- b) da se dugoročnim planiranjem i stručnim programima obezbjedi održivo korišćenje i stručno upravljanje ribljim fondom i očuvaju prirodna staništa;
- c) da se adekvatnim i pravovremenim mjerama zaštite ribljeg fonda očuva i unaprijedi riblji fond, biološki diverzitet i ekološki integritet vodenih ekosistema;
- d) da se posebnim mjerama zaštite i očuvaju endemske i ugrožene vrste riba i drugih vodenih organizama;
- e) da se stručno osposobe lica koja obavljaju neki od poslova u slatkovodnom ribarstvu;
- f) da se ustrojem akvakulture omogući njen brži razvoj, poveća obim proizvodnje i ojača konkurentnost na svjetskom tržištu;
- g) da se postiče i unaprijedi razvoj modernog sportskog ribolova i ribolovnog turizma.

Imajući u vidu navedene razloge, realno se nameće potreba za donošenjem ovog Zakona.

**Ukratko:** Donošenje ovoga Zakona predlaže se u redovnom postupku u želji da se sva pitanja iz zakona što detaljnije i jasnije urede, a posebno: rad inspekcije, ovlašćivanje naučno-stručnih ustanova za poslove ribarstva, pitanje akvakulture, da se opravdaju privredni razlozi donošenja zakona, da se stvore zakonske pretpostavke za davanje ovlaštenja za obavljanje naučno-stručnih poslova za ribarstvo, da se svi podzakonski propisi na temelju kojih se provode odredbe Zakona usklade i jasno definišu kako bi se stvorio zaokruženi pravni okvir za održivo ribarstvo. U proteklom periodu dodijeljena su ribolovna prava na osnovu kojih ovlaštenici upravljaju ribolovnim vodama, povlastice za akvakulturu na osnovu kojih se obavlja uzgoj slatkovodne ribe i drugih vodenih organizama i povlastice za privredni ribolov na rijeci Savi. Dozvole su distribuirane putem sportsko-ribolovnog saveza, a ribolovne dozvole od kojih je ostvaren nepoznat

budžetski prihod. Tokom primjene važećeg Zakona o slatkovodnom ribarstvu uočeni su određeni nedostaci u pojedinim članovima Zakona koji su onemogućavali kvalitetnije upravljanje ribolovnim vodama i zaštitu ribljeg fonda, npr. naknade štete pričinjene ribljem fondu. Zbog toga su predloženim Zakonom na bolji način uređene mjere upravljanja kao i mjere zaštite ribljeg fonda. Došlo je do promjena nadležnosti koje je trebalo ugraditi u ovaj nacrt Zakona. Također, na bolji način su riješena određena pitanja u vezi dostave podataka u akvakulturi, te stručnog vođenja i upravljanja ribolovnim vodama. Definicije pojedinih pojmova u smislu njihovog preciznijeg definisanja što će pridonijeti boljoj primjeni Zakona. Osim toga izmijenjeni su članovi Zakona koji određuju naknadu za obavljanje ribolova na način kojim se osigurava više sredstava za nosioce ribolovnog prava koji su dužni osigurati kvalitetno upravljanje i zaštitu ribljeg fonda.

Proračunski dio treba biti namjenski za očuvanje ribljeg fonda u „otvorenim“ vodama (izrada planova upravljanja, monitoring, izrada studija za ocjenu ribolovnih mogućnosti u akumulacijama i sl.).

Prilagodbe novim normativnim rješenjima neće predstavljati finansijski teret za sudionike u slatkovodnom ribolovu.

### **III. OBRAZLOŽENJE PREDLOŽENIH RJEŠENJA**

#### ***DIO PRVI-OSNOVNE ODREDBE (čl.1.-13.)***

U ovom poglavlju date su opšte odredbe koje se odnose na sadržaj i primjenu Zakona, značenje pojmova i definicija koji se koriste u tekstu Zakona, načela, subjekti u ribarstvu i njihove nadležnosti.

Odredbama člana 9. propisano je da će naučne, stručne, analitičke i druge poslove iz oblasti slatkovodnog ribarstva obavljati naučne, stručne ustanove i pravna lica na osnovu ovlaštenja koje izdaje FMPVŠ uz ispunjenje uslova koji su propisani ovim Zakonom i podzakonskim aktima donesenih na temelju istog.

#### ***DRUGI DIO - RIBOLOVNE VODE (čl.14.- 16.)***

Definisane su ribolovne vode i izvršena je njihova podjela na tekućice i stajačice, izvršena podjela na osnovu bioloških karakteristika.

Radi problema koji su evidentni u praksi i nemogućnosti pristupa ribolovaca, ribara, korisnika dozvole za privredni ribolov, korisnik ribolovnog prava, korisnik rješenja za ribolov u naučno-istraživačke svrhe u ribolovnoj vodi članom 15. definisano je pravo pristupa ribolovnoj vodi, prilazima preko zemljišta koje se nalaze uz ribolovnu vodu, obaveze, način nadoknade štete vlasniku zemljišta.

Članom 16. propisano je da Federalni ministar propisuje biološku kategorizaciju ribolovnih voda, nazive ribolovnih područja i ribolovnih zona, njihove granice, namjenu (privredni i sportski ribolov, akvakultura), oblik i sadržaj obrasca, način vođenja Katastra, te druga pitanja vezana za privredni ribolov.

#### ***TREĆI DIO - RIBOLOV (čl. 17.- 41.)***

**U Poglavlju I Privredni ribolov (čl.17.-22.)** određeno je u kojim ribolovnim područjima/zonama se može obavljati privredni ribolov, ko može obavljati privredni ribolov, dozvola za privredni ribolov, postupak dobijanja dozvole za privredni ribolov, ugovor o obavljanju privrednog ribolova (koji zaključuje kantonalni ministar sa

korisnikom dozvole), rokovi zaključivanja ugovora, obaveze korisnika, namjena sredstava uplaćenih za naknadu za obavljanje privrednog ribolova, zabrana obavljanja privrednog ribolova, oduzimanje i prestanak važnosti dozvole za privredni ribolov, prava i obaveze ribara.

Odredbama člana 18. a u skladu sa presudom Ustavnog suda Federacije BiH, uređeno je da kantonalni ministar donosi rješenje o davanju dozvole za privredni ribolov pravnim licima uz naknadu, na osnovu provedenog javnog konkursa. Odluku o uslovima konkursa, visini naknade na prijedlog kantonalnog ministarstva i pribavljenog mišljenja općine donosi nadležna kantonalna vlada.

Odredbama člana 19. propisano je da kantonalni ministar s korisnikom dozvole za privredni ribolov zaključuje ugovor o koncesiji za obavljanje privrednog ribolova a obavljanju privrednog ribolova kojim se utvrđuju: naziv ribolovnog područja/zone, veličina i granice ribolovnog područja/zone, mjesto, način i uslovi obavljanja ribolova, mjere koje se moraju preduzimati radi zaštite i očuvanja ribljeg fonda, visina i način plaćanja naknade za obavljanje ribolova, uslovi raskidanja ugovora i oduzimanja dozvole za privredni ribolov, te drugi elementi obligaciono-pravnog karaktera.

Stavom (4) člana 18. propisano je da su sredstva uplaćena za naknadu za obavljanje privrednog ribolova namjenska sredstva u omjeru 30% kantona i 30 % općina i koriste se isključivo za poribljavanje ribolovnih voda u ribolovnom području/zoni za koje je izdata dozvola za privredni ribolov. Sredstva koja pripadaju 40 % Federaciji i koriste se za izradu strateških dokumenata, izradu i realizaciju programa za razvoj ribarstva, kao i za nadoknadu štete koju su prčinile zaštićene životinjske vrste.

## ***Poglavlje II. Sportski ribolov (čl. 23.-37.)***

Poglavljem II uređeno je gdje se može obavljati sportski ribolov, lice koje je stručno osposobljeno može obavljati sportski ribolov, ribe ulovljene u sportskom ribolovu ne smiju se stavljati u promet, ribolovno pravo, ko je korisnik ribolovnog prava, kako se dodjeljuje ribolovno pravo, ugovor o dodjeli ribolovnog područja/ribolovne zone, njegov sadržaj, oduzimanje i prestanak važenja ribolovnog prava, način korištenja/upravljanja ribolovnim područjem, planski dokumenti na osnovu kojih upravlja korisnik ribolovnim područjem/zonom, označavanje granica ribolovnog područja, ribolovne dozvole, način njihove isporuke, prava i obaveze ribolovaca i ribočuvarska služba.

U skladu sa presudom Ustavnog suda Federacije BiH i Zakonom o lokalnoj samoupravi, članom 24. stav (4) definisano je da se ribolovno pravo dodjeljuje putem javnog konkursa koje provodi kantonalno ministarstvo, a odluku o uslovima konkursa i visinu naknade na osnovu prijedloga kantonalnog ministra i pribavljenog mišljenja općina, donosi nadležna kantonalna vlada, a članom 24. stav (8) da su sredstva od naknade za korištenje ribolovnog područja/zone namjenska sredstva kantona u omjeru 40% i općina 40% (koriste se za poribljavanje ribolovnih voda, zaštitu i unapređenje ribljeg fonda u ribolovnom području zoni za koje je izdato ribolovno pravo.

20% sredstava pripada Federaciji BiH za izradu strateških dokumenata, izradu i realizaciju programa za razvoj ribarstva kao i za nadoknadu šteta koje prčinu zaštićene životinjske vrste.

## ***Poglavlje III. Privredno-sportski ribolov (čl. 38.- 40.)***

Poglavljem privredno-sportski ribolov uređuje se gdje se može obavljati, ko može obavljati ovu vrstu ribolova, dozvola za privredno-sportski ribolov, oduzimanje dozvole.

#### ***Poglavlje IV. Posebni vidovi ribolova (čl. 41.)***

Odredbe ovog poglavlja uređuju posebne vidove ribolova kao što su ribolov u naučno istraživačke svrhe, selektivni ribolov, sanacioni ribolov, ko može obavljati ove vrste ribolova, dozvolu i način dobijanja dozvole, alati kojima se obavljaju.

#### ***DIO ČETVRTI - AKVAKULTURA (čl. 42.-46.)***

Odredbama četvrtog dijela uređuje se gdje se može obavljati akvakultura, ko može obavljati djelatnost akvakulture, pod kojim uslovima, određuje se visina naknade za izdavanje dozvole za akvakulturu.

#### ***Poglavlje I. Dozvola za akvakulturu***

Odredbama Poglavlja I definiše se dozvola za akvakulturu, ko je izdaje, uslovi koje treba ispuniti za dobijanje dozvole, obaveze korisnika dozvole za akvakulturu, odobrenje za uzgoj autohtonih i alohtonih vrsta riba, oduzimanje i prestanak važenja dozvole za akvakulturu kao i prestanak važenja dozvole za akvakulturu.

#### ***DIO PETI - ZAŠTITA, OČUVANJE I UNAPRIJEĐENJE RIBLJEG FONDA (čl. 47.-59.)***

Riblji fond je državna svojina i prirodno dobro od opšteg interesa, te se istim mora upravljati na stručan i održiv način kako bi se zaštitio riblji fond i prirodna staništa riba i drugih vodenih organizama i obezbjedilo očuvanje biološke raznolikosti u slatkim vodama. Zaštita i očuvanje biološke raznolikosti osiguraće se:

- Poribljavanjem ribolovnih voda (autohtonim vrstama riba utvrđenih genetskih karakteristika i u prisustvu Komisije za ribarstvo i stručno osposobljene osobe korisnika ribolovnog prava);
- Organizovanjem posebnih staništa, a saglasnost za posebno stanište daje Federalni ministar. Radi specifičnosti prirodnih staništa zabranjeno je obavljanje određenih poslova i aktivnosti (vađenje pijeska, kamenja, koristiti čamce, deponovati bilo kakav materijal i vršiti druge aktivnosti koje plaše i ometaju ribe);
- Korisnik ribolovnog prava može pojedine ribolovne vode ili njihove dijelove organizovati kao posebne ribolovne staze kako bi se omogućile nesmetane migracije riba i obezbjedile njihove normalne fiziološke aktivnosti;
- U cilju obnove ribljevog fonda korisnik ribolovnog prava može donijeti privremenu ili trajnu zabranu ribolova;
- Zabrana ribolova;
- Nadoknada štete pričinjene ribljem fondu.

#### ***DIO ŠESTI - VOĐENJE EVIDENCIJE U RIBARSTVU (član 60.)***

Svi korisnici nekog od prava dobijenih na osnovu ovog Zakona i propisa donosenih na osnovu istog, dužni su voditi evidencije o ulovu ili proizvodnji ribe i dostavljati u propisanom roku izvještaje.

## ***DIO SEDMI – UPRAVNI NADZOR (čl. 60.-63.)***

Ovim Poglavljem Federalno ministarstvo je određeno kao vršilac upravnog nadzora nad provođenjem ovoga Zakona i propisa donesenih na osnovu ovoga Zakona koji su ovim Zakonom stavljeni u nadležnost Federacije BiH kao i upravni nadzor nad institucijama, ustanovama i organizacijama u obavljanju poslova određenih ovim Zakonom, a koji predstavljaju vršenje javnih ovlaštenja, a vrši nadzor i nad kantonalnim organima uprave nadležnim za poslove poljoprivrede u dijelu izvršavanja federalne politike, kao i provedbe mjera u oblasti agrara.

Kantonalni organ uprave nadležan za poslove poljoprivrede vrši upravni nadzor nad provedbom ovoga Zakona i propisa donesenih na osnovu ovoga Zakona koji su ovim Zakonom stavljeni u nadležnost kantona.

U okviru odredbi koje se odnose na inspekcijski nadzor propisano je da isti vrše: federalne poljoprivredne inspekcije organizovane u Federalnoj upravi za inspekcijske poslove i kantonalne poljoprivredne inspekcije organizovane u kantonalnim upravama za inspekcijske poslove. Inspekcijski nadzor se vrši u skladu sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama u Federaciji BiH („Službene novine Federacije BiH“, br. 73/14 i 19/17).

## ***DIO OSMI - KAZNE NE ODREDBE (čl. 64.-70.)***

Kaznenim odredbama propisane su novčane kazne za pravna lica, odgovorno lice u pravnom licu, fizička lica-obrtnike, ovlaštene ustana lica i udruženja, kao i za fizička lica. Pored novčane kazne kaznenim odredbama definisane su zaštitne mjere oduzimanja predmeta, kao i zaštitna mjera oduzimanja imovinske koristi pribavljene izvršenjem prekršaja.

## ***DIO DEVETI - PRIJELAZNE I ZAVRŠNE ODREDBE (čl. 71.-75.)***

Član 71. – propisuje se rok za usklađivanje poslovanja korisnika ribolovnog prava sa odredbama Zakona

Član 72. – propisuje se rok za donošenje podzakonskih akata;

Član 73. – propisuje se rok primjene važećih podzakonskih akata;

Član 74. – propisuje se prestanak važenja propisa;

Član 75. – propisuje se stupanje na snagu ovog Zakona.

## **IV FINANSIJSKA SREDSTVA**

Donošenjem ovog Zakona neće trebati dodatna izdvajanja sredstava iz Budžeta Federacije BiH.